

揭陽縣志卷之六

人物志

賢達

司馬遷云古者富貴而名磨滅不可勝數惟個儻非常之人稱焉世有身都通顯烜赫里閭迨世謝時移過其廬者不能憶其姓氏有僅縮半通或潛德弗曜而名迹所至每爭其生長地以爲榮故人非無位之難無令名之難也揭夙負海濱鄒魯人材輩出宋則陳思仲有廣南夫子之稱黃章卿騰汀州生佛之譽其先河乎明嘉隆而後如中離之理學襄敏之事功子修之忠鯁仲常之詞翰稱翹楚矣外此分猷布化仁聞仁聲策功於仕籍者抑不乏人焉志賢達

揭陽縣志卷之六

賢達

漢

吳碭字叔山建安中舉孝廉爲安成長孫權使呂岱取長沙郡碭堅據不從權遣魯肅攻圍碭突去曰碭受天子命爲長知有漢不知有吳也權後統有交廣碭卒不仕祀鄉賢

唐

陳元光先世家潁川祖洪爲義安丞因留居爲揭陽人父政以武功隸廣州揚威府元光習韜鈴善用兵累官鷹揚衛將軍父死代爲將統兵鎮閩儀鳳二年崖山劇賊陳謙攻陷岡州隨陷潮陽潮州刺史常懷德檄元光討之元光入潮伐山開道大小百餘戰俘馘萬計嶺表以次就平還軍於閩奏請置漳州謂周官七閩宜增爲八詔從之卽命元光移鎮未幾閩寇大熾戰沒於陣事聞贈右豹





韜衛大將軍立廟漳浦開元四年追贈潁川侯謚曰昭烈府祀鄉賢

宋

陳希伋字思仲漁湖人元豐間兩冠鄉書肄業太學十餘年聲譽日著士人目爲廣南夫子上書陳利害數萬言皆切中時病復薦太學生馬錫有文武才乞加擢用元祐六年舉經明行修時賜第者三百四十六人希伋爲第一知梅州時朝廷下諸州取黃砂牛皮及出內庫錢買珍珠以備國用諸州郡皆供應希伋獨不忍剝取於民乃上封事奏免州人德之卒於官所著揭陽集四百餘篇祀鄉賢

黃煥國字章卿在城人紹興二年壬子張九成榜進士宰臨汀政務

揭陽縣志

卷之六

賢達

二

綏和有戡亂功通判汀州秩滿民臥轍留之立祠於南安巖再遷鄞江三年卒中散大夫郭正己贊之曰仁波德澤雨露均施忠肝義胆日月爭輝譽著三陽功全五陟生佛見稱汀民廟食祀鄉賢鄭國翰字寧夫藍田人紹興十八年戊辰王佐榜進士與朱子同榜初授莆田令歷官兵部郎中見國事日非致仕歸築莊於藍田之飛泉嶺集生徒講學其中朱子遊揭陽常主於其家名益藉甚學者稱澹軒先生

王中行隆興元年癸未未待問榜進士淳熙十二年授東莞知縣慈祥愷悌博學能文以興學崇化爲首務舊學湫隘弗稱輒遷之文風以振勸農桑均賦役恩敷惠流有古循良風東莞祀名宦邑祀鄉賢有遷學記載省志



明

全生在城人洪武二十六年癸酉歲貢授監察御史謫按察司知事以父憂歸永樂改元起補岷府副審理越三年賜歸又明年部符授宜山令縣有虎患爲文告神逐之其害遂絕在任五年民頌其德以小罪謫交趾歸卒

葉公養在城人永樂間由歲貢授刑部主事疏請卹刑謫四川岳池令會定都燕京敕川省貢木郡縣騷然會三司僉奏不免公養赴闕陳川民疾苦得溫旨越年復職仍以主事攝縣事卒於官民哀之立祠祀焉孫進舉人武定州同知曾孫應熊元孫厚皆歲貢

蔡顥字伯昂在城人景泰癸酉舉人授廣西太平府判官監梧州鹽稅爲巡撫韓雍所器重遷象州牧歲歉不及上聞發票賑饑拂當

揭陽縣志

卷之六

賢達

三

道意致仕歸行李蕭然授徒里中少卿吳裕郡丞張濬皆出其門邑宰陳爵遣弟佐受業宏治間佐任本府推官簠簋不飭顥絕之臨沒賦詩云平生耽讀數行書出守邊城在一隅律已未曾踰矩度持身恆欲絕塵汙傳家不患田園少繼世惟憂孫子愚俯仰二儀難不愧永爲清苦老寒儒識者謂爲實錄

徐虔字宗敬號肅軒官溪人天順丁丑進士授兵部主事進香錫宴鈔俵馬不受常例還有鄉人歿京邸不能歸者殯之又有收骸檢囊遺物付其家者人咸德之考滿晉承德郎山東旱與僚長悉心區畫民賴以活眞定等郡水奉勅往勘量地蠲免民咸戴之升鎮遠知府興學校勸農桑轉刀劍爲牛犢有龔渤海之風四年謝病歸子衍孫日煥俱舉人



陳仕寶號介菴龍溪人天順壬午舉人癸未捷進士授南京戶部主事轉郎中曹事肅清出知夔州府持己廉潔爲民興利除害以勤慎著績陞陝西參議晉右叅政尋謝政歸卒年七十二弟仕輔郡諸生有才名以恩授承事郎康熙辛酉舉人廷琦其後也

吳裕字敬昆霖田人訓導胄之子成化壬辰進士授戶部主事改吏部文選司郎中能其職歷十八年擢右通政以母老乞歸母卒終制改太僕寺少卿時雲中用兵裕已嬰疾猶日治馬政卒於官計聞朝廷遣官諭祭曰惟爾早通經術起自遐方馳譽賢關奏名甲第初官民部簡置銓曹進佐銀臺荐陞太僕聲稱益著勞效良多委用方殷胡遽長逝追惟往勩宜示卹恩特勅有司爲營葬事遣官諭祭用慰爾靈九原有知尙克承享祀鄉賢

揭陽縣志

卷之六

賢達

四

林昕字宏耀號鈍齋漁湖人成化庚子解元初除昆陽牧州人未知學昕首興學立師癸亥學災復增建之巨寇楊萬鍾聞風向化率夥盜投戈願列爲編氓州治東海口屢溢爲濬渠泄之漑田萬計尋擢廣信府丞復州軍之誣役三十六戶民稱其惠冢宰聞名薦擬僉憲以疾致仕歸卒海陽尙書盛端明爲之誌其墓

許珊字仕選霖田人成化癸卯舉人少負異資勤於學爲少卿吳裕所重授徒鄉里御史鄭一初出其門與郡丞車份善未嘗干以私選授柳城令見明倫堂基址湫隘拓之又建社學俾士子肄業邑有猺獞自宣廟時已不輸國課珊至咸歸誠奉法令以疾致仕歸祀名宦

王昂字抑之桃山人少負奇節事母孝居喪哀毀幾殆成化甲辰進



士授永豐令覈詭籍革巫俗擒宿盜辨民冤新學宮復歐陽修墓  
購求羅倫一峯集梓之嘗禱雨命童子號曰令有罪民何辜天終  
不雨令可屠歌罷雨至又時大疫延數千家昂躬與祈禳病者皆  
起以治行高等擢太僕寺丞察馬政利病條成一疏四千餘言會  
遘病卒所遺僅詩文數卷及宋史補數冊祀鄉賢祀江西永豐名  
宦見一統志

莊典字惇之龍溪人宏治丙辰進士授安福令性峻潔不阿每事必  
札記而行一稟於法或以召謗難之曰三尺法如是吾知奉法而  
已延接士大夫雍雍如也無敢干以私創學舍五十餘楹以居生  
徒期望與爲講論不倦考最疏乞改教調國子博士尋擢德府長  
史丁內艱起補淮府時宸濠蓄異志挾借支祿米典持不與豪怒

揭陽縣志

卷之六

賢達

五

召往見典植立庭下詞色俱厲杖之隨下獄不食三日衣冠危坐  
而歿御史王完疏其忠嘉靖改元贈太常少卿遣官諭祭曰惟爾  
賦性聰明持身端謹早膺簡拔輔導宗藩耻附逆濠毅然守正橫  
遭囚辱箠責而亡新政之初忠賢在念特頒卹典贈祭爾靈冥漠  
有知尙克歆慰淮王遣使祭曰莫非人臣爾獨賢勩人孰不死爾  
獨就義雖死猶生乾坤正氣爾應含笑爾曷有愧一鑑云亡我曷  
不淚薄奠是將昭格不昧祀鄉賢

祀安福縣名宦見吏部  
尚書唐龍循吏錄序

楊典字景瑞龍溪人與弟瑋俱師事陳獻章正德戊辰進士授監察  
御史彈劾不避權要奏徙牧馬草場以防火患按江南全活憲獄  
百餘人以養病歸居家宗有訓族有規鄉有約化行於鄉潮久苦  
隄潰典聞奏勅有司堅築爲民永賴與王守仁友善嘗爲庭訓錄



守仁序之曰古人所有教其子者不外於身心性情之德人倫日用之常後世文詞以爲功機械以爲智巧利以爲能浮夸以爲美父以是爲能訓子以是爲善承蓋與古人之教相背而馳矣亦何怪於人心之日壞而風俗之日媮乎吾友侍御楊君景瑞獨能以是訓其子其亦庶幾乎古人之意矣爲楊氏之子若孫者果能沿是而進勉勉不已雖爲聖賢可也君之子思元從予遊暇中持斯冊來視因爲識數語歸之卒祀鄉賢海揭各有專祠

楊瑋字約齋龍溪人侍御瑱同懷弟也性穎異勵志力學從遊者多有成就登宏治壬戌進士試南京戶部主事奉命按江南糧儲廉能公正吏民畏服有贛令以黃金置盜中託言蜜煎以獻發之乃金也立却之歷本部郎中在部八年出知辰州尋擢貴州按察副揭陽縣志

卷之六

賢達

六

使念母老欲乞終養會邊鄙多故戎務方殷不果日繕阨塞釐軍籍撫戢殘黎境內大治未幾丁母艱抵家過於哀毀十餘日卒士論惜之

鄭一初字朝朔官溪人少讀書紫服山因號紫坡和易謹介不立崖畛無疎戚遠邇咸敬愛之宏治乙丑進士越年正德改元劉瑾用事不謁選家居以耕讀教子弟於世味澹如也有鄉人緣事在囹以百金求爲居間曰名義至重鬼神難欺敢饒舌作說客耶却之劉瑾旣敗赴都授試御史巡按雲南風紀肅然在京師從王守仁講學日與橫山箬溪諸賢相質問得聖賢之旨以疾乞休途次杭州卒祀鄉賢子大崙舉人另有傳

潘文明字朝選龍溪人宏治甲子舉人授玉山令有異政民有以麥



一莖兩岐者三十餘本獻之轉漳州通判廉明有聲尤加意犴狴民無冤濫時重囚越獄遮殺有司獨相戒勿犯潘府倅後歸里多德讓人咸重之既老舉一子名應祝以鄉人羣爲祝也祀鄉賢

薛俊字尙哲號靖軒龍溪人自少端慎居父憂哀毀盡禮後雖遇吉慶不聽樂事母益謹兄弟六人友愛無間宏治甲子領鄉薦授連江訓導楊督學器重之以閩清古田二邑僻陋委俊往選其秀皆得人遷玉山教諭弟侃師事王守仁歸以所聞者語俊俊大喜正德十一年守仁過玉山遂請爲弟子問行已之要守仁曰聞子篤行久試自言之曰俊未知學但凡事依理而行不敢出範圍耳曰依理而行是理與心猶二也當求無私行之則一矣自是有悟學益進連典滇楚文衡擢國子學正方臥病聞母喪水漿不入口卽

揭陽縣志

卷之六

賢達

七

日奔喪時子宗鎧令貴溪舟次其地疾轉劇輿入署中卒祀鄉賢弟侃進士行人僑進士歷官翰林左春坊子宗鎧進士另有傳王軾字國瞻桃山人正德庚午舉於鄉授懷遠教諭誨人有方擢蕪湖令值宸濠變起王師往討中使張勇等奉命猝至邑藩臬以下多畏避軾獨當之芻糧畢備後武宗南巡撫按檄各縣督民往役會酷暑人多暍死軾憫民勞齎銀僱役當事以怠事劾之卽引歸民皆刻像祀於家祀鄉賢

劉漢字宗之桃山人正德癸酉舉人授滁州學正陞安化令清苦愛民一日城南火起漢披髮往救望空拜禱火隨滅然上官每以其貌易之遂引疾歸後令於廳事壁隙中屢得漢手書小札皆自警語以是服其慎修之功祀鄉賢



林鳴鸞字應時號竹洲霖田人年十八登正德癸酉舉人歷官嘉興府丞擢南京戶部郎中出知都勻府咸稱廉明時有陸傑陸相諸生也以罪繫獄擬大辟鳴鸞夜出聞囹圄讀書聲詢吏具以對嘆曰當此時而猶勤學不輟必非凡材也明日弔訊察其冤試以文大奇之力爲申雪得末減免死越三年兄弟俱聯捷成進士後傑任廣東布政遣吏至鳴鸞家迎之值鳴鸞在京師遂迎其父明山至署復疏請建坊於揭以酬其恩時論兩賢之孫如冕仕按察司經歷

薛侃字尙謙龍溪人性至孝父病革嘗糞鄉里稱之正德庚午舉人丁丑成進士卽疏歸養母師事王守仁於留都兩載迄辛巳赴銓授行人聞母訃隕絕復甦五日始食粥居中離山與士子講習不

輟學者稱爲中離先生嘉靖七年起補故官聞守仁歿爲位以哭已而進司正時方議文廟祀典侃疏請罷公伯寮秦冉顏何馬融增祀陸九淵陳獻章皆報可惟獻章未允十年春疏請正學以安聖躬夏疏請復古制以新士習悉見納至秋疏言祖宗分封子弟必留一人京師司香有事居守或代行祭饗列聖相承莫之或改至正德初逆瑾懷貳始令就封乞稽舊典擇親藩賢者居京師慎選正人輔導以待他日皇嗣之生此宗社大計帝方祈嗣諱言之震怒立下獄廷鞫主使者南海彭澤爲吏部郎因議禮附張璁官至太常卿侃以疏草示澤澤與侃及少詹夏言皆同年而言是時數忤璁澤默計儲副事觸帝諱必興大獄誣言同謀可禍也給侃藁示璁因報曰張公甚稱善當從中贊之璁乃先錄侃藁以進謂



出於言請勿先發以待疏至帝許之侃猶豫澤頻趣之乃上拷掠備至侃獨自承累日獄不具澤挑使引言侃瞋目曰疏我自具趣上者爾也言何預會廷臣再鞫具得其實帝出璫密疏示廷臣斥其忤罔令致仕侃爲民澤戍大同侃至潞河遇聖壽節焚香叩祝甚謹或報參政項喬曰小舟中有民服而祝聖者喬曰必薛中離也跡之果然歸益力學講學於羅浮永福寺從遊者百餘人嘉靖二十四年始還里卒年六十生平書札往來論辨者如王龍谿錢緒山德洪魏莊渠校鄒東廓守益李三洲義壯龐弼唐嵩王青蘿漸逵等皆一時偉人也學以致良知爲主動靜必印本心操守如鋼百鍊臨刃鋸鼎鑊弗少挫卒能以名節自完識者謂其真能無愧師門云所著有研幾錄圖書質疑諸書隆慶元年復官贈承

仕郎河南道監察御史勅曰國家於忠鯁之臣生或未究其用則於其沒也褒錫之典必加焉所以彰往而勸來也爾發身甲第筮仕大行夙懷漆室之憂獨獻儲宮之議言雖太驟心實無他業禡職以歸林邱猶譚道而訓閭里清風可尙沒世有稱特遵遺詔以覃恩載煥新綸而進秩於戲正氣長存聞風者已竦然而有直志寵光永賁過門者諒式焉而動遐思豈獨備乎彝章久有稗於化理睠茲英爽尙克欽哉祀鄉賢

黃一道字唯夫號月溪藍田人教授勳之子正德庚辰進士授戶部主事奏革漁蠹嘉靖初疏議大禮出知興化府以正學率諸生卹民隱清滯獄夙夜勤政又建寧海橋築長城堤以利百姓民爲立祠卒祀鄉賢孫杞大名府訓導



薛宗鎧字子修號東泓國學正俊之子師事王守仁嘉靖癸未與從父僑同登進士授貴溪令調將樂以才堪治劇移調建陽剔奸裁費修學建橋又置贍士田復求朱子後復之以主祀事嚴禁淹女歲饑賑濟倉粟先發後聞擢禮科給事中以逋賦還原任至則民爭輸課更最再遷戶科左給事中極論冢宰汪鋌儉邪肆奸植黨擅主威福且縱二子爲奸利乞立正厥辟因御史魯紳疏內有諍臣杜口之語帝怒罷鋌官而責宗鎧等言不早執下鎮撫司鞫訊杖八十賦詩賣志而歿汪鋌嘗語人曰吾力能死曾薛二言官歸無憾矣後鋌與其子鬪發疽背而斃人謂紳等冥禡其魄云隆慶元年復官贈奉議大夫光祿寺卿制曰國家立諫議之官期進言以匡主人臣篤繩糾之義非竊直以沽名矧因國是而殺身豈復

揭陽縣志

卷之六

賢達

十

綸恩之可後爾剛方賦性甲第發身遇事獻陳激論屢形於殿陛矢心彈劾直聲夙震乎諫垣言多見其施行忠愈奮而不避因偶繩平時宰遂隕命於泉臺久鬱褒伸特遵遺卹於戲玉階碎首早彰正直之風閔壤垂光永慰忠貞之志尙書湛若水銘之曰曷曰良知天知地知曷曰良能天地成能曷以致之學之問之思之辨之篤而行之曷謂之之有物於斯觀天之機六德之興東泓子之知東泓知之不忘不助所行不疑後有求者考是銘詞祀鄉賢子洪廕監生歷武定州同知嘗彙其前後奏疏諸文爲光裕集瓊山通政使海瑞序之

袁鑑字慶昭號衍江鶚浦人潛山教諭魯之姪也嘉靖乙酉舉人授連江令調繁侯官有惠政兵部尙書吳文華其作育士也復調南



京上元令三與清廉宴擢常州同知與長洲文微明友善未幾陞河間長蘆運同河間鹽利甲天下抵任三月輒辭歸微明賦別詩云熙熙噩噩抱吾醇茅棟蔬籬寄此身肯鑿性靈爲物累盡刊文藻見初真百年人物義皇上一笑風煙太古春萬慮不營心卽水只應呼作葛天民歸而家徒四壁依然寒素進階亞中大夫

翁萬達字仁夫號東崖鮑江人嘉靖丙戌進士授戶部主事筦河西務奏遏戚畹牟利帝可之督通州倉權貴人闌入漕道俾奪其舟遭謗不怵辛卯晉郎中出賑畿輔民德之癸巳知梧州時咸寧侯仇鸞鎮兩廣縱部卒爲虐萬達執其健卒撻之鸞自此銜焉丁酉陞廣西副使朝議會討安南總督蔡經用其條議莫登庸聞之懼謀聚毒上流剡竹地中陷馬足數遺邊吏民金錢揚言方舟襲東

揭陽縣志

卷之六

賢達

十一

士以緩師期萬達募敢死士梁文韜等入安南廉得其狀乃下令曰敢與賊通者磔之沒其家能擒賊一人者予百金時龍州憑祥土舍趙楷李寰韋應皆陰助登庸經問策萬達曰兩州瓜連三兇鼎立急則內變生緩則外侮伏楷詐寰勇未可猝圖韋應懦弱寡慮擒之使不相屬且思明士官黃朝可用也乃諭朝設伏擒應楷與寰次第就縛因移師破斷藤峽擒段公丁磔於市繼以兩軍夾攻諸巢賊奔逸督左軍邀擊斬首數百級餘奔羅連山檄右軍遶出其背蹙之凡三旬殲賊殆盡班師作平峽入議登庸益大恐曰天兵將及我矣論功陞一級復獻處置四峒議初四峒介於忠州爲思明裔土天順五年以亂故屬思明後忠土帥黃賢相陰肆蠹食至是議屬南寧設一撫民通判治之立保甲峒老以和戢其民



賢相初猶驚甚及牒下乃納地經喜曰翁君神算也庚子八月晉  
浙江參政以有事安南奏留佐尚書毛伯溫九月三鎮兵趨集南  
寧檄萬達分屯龍憑思明以待萬達遣指揮王良輔等出關諭登  
庸十一月詣鎮南關登庸遣兄子文明土目許三省上表入朝請  
降上許之詔罷安南爲都統使司登庸請要言同列以屬萬達萬  
達告之曰朝廷待汝以不死宜一心永奉外藩立書千餘言繩之  
登庸跪聽惶恐唯唯而退壬寅秉臬四川癸卯擢陝西布政使甲  
辰三月晉副都御史巡撫陝西十二月拜兵部侍郎總督宣大山  
西保定軍務首劾罷將臣邵永姜夔貪耗不職謹偵候明賞罰軍  
令肅然每當防秋發卒乘障陰遣卒傾硃於油察離次者硃其處  
卒歸輒縛毋敢復離次者嚴禁殺降違輒抵死得降人撫之如所

親以是益知敵情乙巳七月大同宗室充灼等將勾敵爲變萬達  
密遣總兵周尙文發其奸械送京師踰年伏誅八月敵大入寇麾  
兵與戰敵遁去屢疏請築邊牆內險外險極邊次邊言之甚悉帝  
報可發帑金六十萬乃由老營堡一帶延袤二百里萬達精心計  
善勾校墻堞近遠濠塹深廣曲盡其宜自居庸以臨三鎮嚴整比  
於內地敵乃不敢輕犯萬達更事久帝深倚之獨言俺答貢事與  
帝左初俺答遣石天爵求貢巡撫龍大有執而殺之萬達言宏治  
前俺答歲入貢疆場稍寧自虞臺嶺之敗漸輕中國侵犯四十餘  
年石天爵事臣嘗痛邊臣失計帝不聽當是時曾銑方復河套萬  
達議曰河套本中國故壤成祖三犁王庭殘其部落舍黃河衛東  
勝後又撤東勝以就延綏套地遂淪失今欲一舉復之母乃不易



乎提軍深入山川之險易途徑之紆直有無皆未悉知我馬出塞三日已疲彼騎一呼可集我軍數萬衆緩行則備益固疾行趨利則輜重在後卽得少利歸師尙艱尙失鄉導全軍殆矣上不省寇犯滴水崖據險不退萬達督叅將姜應熊等馳赴順風鼓譟揚沙蔽天寇大驚曰翁太師至矣拔營東走總兵趙國忠破之於大濬沱分道追擊敵宵遁上聞之喜晉兵部尙書兼左副都御史戊申十月以父喪歸庚戌秋大同失事詔起之乞終制未達而俺答犯都城兵部尙書丁汝夔得罪趣以萬達代之萬達泣曰苦塊僇臣忍令主憂至是倍道行四十日抵近京時寇氛熾上屢問萬達來期於嚴嵩嵩不悅萬達言寇患在肘腋諸臣觀望帝遂用王邦瑞於兵部不數日萬達至具疏自明帝責其欺慢奪職聽別用仇鸞

揭陽縣志

卷之六

賢達

十三

時爲大將軍寵方盛銜宿怨構讒言於帝萬達遂失眷降兵部右侍郎經略紫荆諸關京察自陳乞終制帝疑其避事免歸抵家葬父負土成墳廬於墓側壬子十月詔復兵部尙書時由武夷至清流忽病亟卒越六日簡命至不逮矣萬達事父與繼母至孝好談性命之學與歐陽德羅洪先唐順之善通古今操筆頃刻萬言爲人剛介坦直勇於任事履艱危意氣彌厲臨陣嘗身先士卒尤善御將士得其死力居官俸入一無所私賙於黨族在鎮時六賜金幣加恩蔭二子萬達以獨子疏辭不許乃請蔭弟萬程贈太子太保賜祭葬隆慶中追諡襄敏所著有稽愆集平交紀畧總督奏議若干卷祀鄉賢子思佐以蔭歷官戶部郎中襄敏卒年五十五時思佐方七歲不爲嫡母所喜積誠感動漸得其懽補官數年念嫡



母年老疏歸終養比易簣猶詣母一訣然後安枕以瞑

陳思謙字益撫號碧洋鮑江人性穎悟幼侍父孝廉世俊遊成均爲薛行人侃所稱文名藉甚中嘉靖乙酉解元丙戌成進士知浦城始至若無所知踰年盡悉縣之情狀摘伏如神闔邑悚然不敢犯以忤上官意罷歸尋遊京師謁龍谿王畿得聞性學以薦復官改任北直之撫寧則又寬厚或問之曰撫寧非浦城比也浦城疲頑非明斷無以行法撫寧地瘠民艱且困於兵民有離心而無生氣不以寬厚寧可治耶居二年晉戶部主事丁父憂廬墓三年以病卒祀鄉賢

吳繼喬字世達號之溪梅岡人嘉靖戊子舉人聞王守仁講學蒼梧往從之遊丁內艱會稽季本名御史也謫邑簿雅重之賻以金辭

揭陽縣志

卷之六

賢達

十四

不受服闋授宜章令時虔寇李文彪敗走傳聞匿於桂陽官軍追勦將屠之繼喬力爲營免旋以父憂歸終制起補江華令民有僞居者州守鄉人也爲仇家計殺定罪與州守不合因告歸家居二十年議保鄉善俗事宜太守郭子章多所採納代同年文昌張允弼償債數百金張死召其子以券還之卒年八十一海陽張通判大會曰先生蚤修於家尺步繩趨晚施於國澤邕仁孚南州哲士嶺海真儒祀鄉賢

黃鵬字搏之號南溟地美人僑居潮陽嘉靖壬辰進士授閩縣令徵科不擾公餘卽手一編以清淨爲化擢南京工部主事洊歷郎中當官幹實不苟徇時好遇事侃侃無所迴避出知南寧府未抵任卒生平志在素修不營田宅杜門習靜鄉人目之爲黃佛太史蕭



端蒙嘗曰過其廬者不知黃子之居入吾邑者不識黃子之貴蓋紀實云

鄭一統字朝慶號碧河官溪人幼篤學言笑不苟年二十三領嘉靖辛卯鄉薦乙未成進士入翰林器宇寬厚負文名同院任瀛康太和等皆推重之館試屢第一授編修戊戌以父憂歸讀書山中足跡不至城市壬寅服闋將赴都遽病卒年三十四抱才不及施用人咸惜之

鄭天憲磐溪人嘉靖甲午舉人授來賓令峒賊爲患廉得其黨悉寘之法有韋氏六人倡亂天憲單騎深入諭以威信韋面縛待罪尋陞雅州牧州治爲諸葛孔明駐節處特立武侯祠祀之邊寨故無城創築以石復建書院顏曰靜學取武侯語也轉晉藩長史祀來

揭陽縣志

卷之六

賢達

十五

賓名宦

楊惟執字昆山號一溪桃山人嘉靖丁酉舉人歷官劍州守以考滿入覲時吉水殷撰羅洪先弟居先爲州判作書報兄曰吾太守古之良吏廉於己敏於政愛民而和僚友劍固僻遠上之人不盡聞其所爲下之人又不能遠爲之譽然始終不少動搖損益洪先得書爲作考績序張之未幾遷嚴州府丞以廉愛稱致仕歸所得俸分與弟姪不以自私并置義庄以贍族之貧者年八十餘卒漳浦進士林成綱銘之曰惟公成立不雜而純處惟嗜學出必樹勲孝友恭儉篤在人倫行葦戚戚葑芑綿綿公平惻怛與物同春行不愧影寢不愧魂仁者之譽不負聖門人以爲實錄祀鄉賢

黃國卿字君任桃山人嘉靖甲辰進士授溫州推官折獄賑饑民咸



德之陞戶部主事守吉安殿撰羅倫稱其廉不絕物清不已甚擢江西提學副使虛公衡鑒士習丕變尋晉浙江叅政卒於官國卿爲人端廉久宦不營生產歸櫬唯圖書數卷而已比福建按察使之命下已不及矣祀鄉賢季子釗台州通判

郭維藩字价夫龍溪人嘉靖甲辰進士以母老不便迎養請補袁州教授入爲國子博士陞戶部主事歷階郎中出知臨安府旋疏乞歸養母卒遂不仕家居值流寇肆掠築寨禦之民賴以寧郡守重其行屢舉鄉賓

黃爽字文明桃山人嘉靖己酉舉人授衡陽教諭邃於學問辛酉分考應天相國申時行通政吳自桐叅政吳天洪皆其所得士也轉國子監助教陞邵武府同知多惠政尋告歸卒年七十子世輝有

揭陽縣志

卷之六

賢達

十六

學行邑諸生孫道臨崇正庚午舉人以孝稱元孫士魁康熙甲子舉人汧陽知縣

余國璽號南塘漁湖人嘉靖壬子舉人授如皋令分校南闈所拔皆知名士性廉潔剛方不染苞苴不避權貴邑有都憲某其子怙勢占人田宅婦女告牒盈几國璽按法繩之不少貸卽日解綬歸里民遮道涕泣立祠祀之居鄉不履公庭當道有疑案每造廬諮訪嘗捐修漁湖南路石橋三十餘處子一詢由明經爲縣令後子孫多遊庠食餼知名於時

鄭旻字世穆地美人博學強記自少知名嘉靖丙午舉於鄉丙辰成進士初授兵部主事時嚴嵩柄國陷豪傑士爲羽翼招致旻旻弗應銜之委辦三殿工程欲乘以中傷旻措置得宜殿成天子嘉之



荷賜銀幣陞武選員外車駕郎中丁內艱起復補職方郎中世廟  
晏駕提軍護西華門隆慶改元大賚往時將領善游賄巧乾沒旻  
職司支發領內帑銀累巨萬按名親給將領無所售其術諸軍獲  
沾實惠聲譽蔚然出守大名大名地重民富官斯土者多擁厚貲  
旻至却餽遺蠲常例凡公堂火耗扣役諸陋規悉裁汰會入覲冢  
宰詢以地方利弊旻曰弊莫甚於馬地銀夫地以養馬戶有編也  
自馬廢而租輸於官府然租存而地沒於豪右稽其役則數千百  
詰其負則伯什戶不勝誅求駢死囹圄是可憫也冢宰惻然爲具  
其事得旨豁免民深德之再補歸德地控江淮向多萑苻驚鳴鎗  
有渠魁狡譎勇壯數寇掠宋衛之交且憑恃城社吏莫能制旻設  
方略募死士懸賞格卒捕斬之四境以寧提學貴州及山西精品

藻振興學校寬嚴有度咸服其公明參政湖廣兼督糧儲擢四川  
按察均著卓聲遷廣西右轄尋轉左轄貴州貴黔中地苗猺雜處  
寬則人急則獸旻恩威並濟皆警服歸化有土酋擁衆盤踞形勝  
雖羈縻爵祿實不給公奉上每一官至輒餌以金帛撫按莫可誰  
何酋自得計愈肆猖獗旻繩之以法田土必清丈供輸令與民同  
乃相戒曰鄭布政廉正不可犯一切錢糧儲侍度支經費悉心稽  
覈蒼猾不敢爲奸又以貴阻山谷舟楫不通則議濬河由思南達  
於川中以濟商旅未幾以積勞卒於官士民哀之相率赴兩院請  
祀名宦旻生平慷慨多大志粹於學問所著有哀拙稿峯山談言  
說者謂嘉隆以策取士得人如鄒應龍林潤孫丕揚以直節鄒善  
鄭旻以理學陸鳳儀能諫姚汝循工詩爲不愧科名云祀鄉賢子



育漸舉人另有傳

謝光業字廷統號三峯桃山人孝廉天經子少聰悟出筆輒有奇氣痛父會試卒於京益下帷攻苦以期丕振先緒登嘉靖癸卯舉人選桂林府推官詳獄維慎大吏賢之擢潼川知州至則却苞苴除秕政平易近人不事苛覈而幽隱畢達州苦派鹽餉重民負逋繫獄死者相望光業捐俸代償旋詳請題免人慶更生去官之日民爲塑像建祠祀焉太學士登子廩庠國榮其後也

孫春芳漁湖人隆慶初恩貢授鄞縣主簿轉連江丞擢知華容馬平二縣晉上思州知州請建州城以資扞衛因其土俗漸變推結爲編民賦役一遵漢制民甚安之轉楚王府左長史致仕卒祀鄉賢孫森字灼鄉漁湖人僑寓海陽萬歷庚子舉人歷滁州知州值歲饑

揭陽縣志

卷之六

賢達

十八

施賑有法殿撰焦竑以其法語於京兆將著爲令尋以覈倉庫之故爲墨吏王應期誣訐褫職御史按部勘狀不實得白陞台州同知旋擢貴州安順知府府自安奢亂後僅存空城初至僦民舍以居三年聚招徠民氣漸復擢屯田監軍道僦副使後爲諸生董其化誣巖巡按糾叅逮勘總督朱燮元具雪之復原官遂不復出卒祀海陽鄉賢

宋兆禴字爾孚漁湖人弱冠領萬歷戊午鄉薦崇正戊辰成進士初授廣昌令清訟獄興文教興築縣城南十月丁外艱歸邑人思而祠之服闋補仁和令蒞任五載清簡愛民公餘與諸生講論詩義嘗訂刻蒙引及潮音社諸篇教多士以廉介失讎使意罷歸世居揭之東郭通籍後舊廬不改與從昆弟大獲爾和兆榕觴咏其間



怡然自得舊耕堂存草其咏屈同姓云攘功世之常何至憂思  
起放逐臣之分何至憤投水胸有一部騷不發不能已騷卷留千  
秋何關死不死集中多老健之作爲一時稱卒年四十三

柯化鵬號聲朝藍田人萬歷戊午舉人授温州推官有惠政讞獄清  
平任滿溫民執香送者盈路有不遠數千里護其歸者其仁愛感  
人如此既歸會山寇竊發其親屬有陷不義者化鵬鳩族撲殺之  
處多難之鄉輟光斂鐔匪類不能爲害崇正辛未歲饑化鵬倡賑  
一方賴以全活者甚衆

邢之桂字仙友漁湖人曾祖節博白知縣世居鳳圍之桂少能文登  
天啓辛酉舉人崇正壬午授臨江府推官執法平允爲清江太史  
楊廷麟所器重攝安福縣事有妖僧聚衆數千爲亂悉捕平之邑

揭陽縣志

卷之六

賢達

十九

賴以安性樸直不事矯飾臺使者益嘉獎之薦於朝甫行取值甲  
申國變棄職歸丙戌山寇竊發揭城陷被執不屈死

郭之奇字仲常別字菽子號正夫在城人年二十二登崇正戊辰進  
士選庶常學博才富不肯曲徇致失溫體仁周延儒二相意請假  
歸省假滿入都改禮部主客司主事提督四譯館奉使冊封荆藩  
轉員外郎丙子典試河南事竣轉郎中以內艱歸服除補原職陞  
福建提學參議杜絕請託時南安伯鄭芝龍勢燄赫奕子成功初  
名森爲泉州諸生芝龍求置高等食餼以相誇耀卽撫按亦欲以  
此羈縻之之奇曰若輩鷹鷂之性豈一廩生所能籠絡乎卒不允  
明年轉副使尋攝按察司事繫豪強平冤獄又攝兵備事時尤溪  
賊陷閩清之奇督官兵日夜馳三百里分布搜勦悉平之流寇犯



江西袁吉諸郡益藩去國走閩賊勢長驅閩界全省震動之奇抵邵武謁益藩請歸國王意不決之奇退而歎曰屏藩失矣吾爲之保障可也請於撫軍提師扼杉關建南賴以安巡撫蕭奕輔巡按李嗣京陸清源先後疏薦擢詹事府詹事中申聞變撫按猶援恆例待哀詔至乃發喪之奇力爭帥閩士縞素哭臨由是忤撫按意又以不納鄭芝龍請時芝龍握重兵叛服不常慮有變歸從僞永明朱由柳奔梧州走交趾出遇大兵擒送桂林斬之就義之日慷慨從容死時年五十六其子與莆田門人薛英舒扶柩歸之奇秀骨天成具有夙慧館選後益沉酣載籍以成一家之言尤邃於聲律太史方拱乾謂菽子詩字字皆心直逼陶杜苦吟孤詣如與古人覲而吸其髓及落筆爲諸體體必肖肖必工工必獨成其致侍知已矣次子天祺歲貢另有傳

黃奇遇字亨臣漁湖人少孤恪守母訓以文章知名登崇正戊辰進士授固安令善於其職得士民心前令劉某以罪繫獄無嗣奇遇憐之購一婢侍及暮而生男後劉釋獄深謝之又嘗捐資築城垣脩邑志甲戌入覲直太監張彝用事奇遇不爲屈對策稱旨擢翰林編脩與脩熹宗實錄歷春坊中允兼起居注旋以母憂歸遂杜門不出自署爲綠園居士卒年六十八

許國佐字欽翼號班王在城人性聰明豪宕嗜酒爲文直抒性靈崛奇嶮峭好吟詩詩最工與番禺才子黎遂球友善嘗稱之崇正辛未成進士授四川富順令調貴州遵義擢兵部主事乞歸養鼎革



後九軍劉公顯等攻城與衆紳謀戰守城破被執國佐自縛詣賊營請以身代賊並繫之拷掠無完膚厲聲罵賊而死時以爲死孝云著有數句話稿蜀絃百洲堂集

羅萬傑字貞卿號庸菴藍田人年十八登崇正庚午舉人甲戌成進士甫釋褐丁外艱服闋授行人兩奉使冊封吉荆二藩庚辰召對便殿給筆札問修練儲備四事侃侃陳利弊深中時艱擢吏部主事轉員外郎時冢宰鄭三俊力澄銓政薦萬傑正直不阿破格畀以選事一矢公慎請託不行在職一年旋以內艱歸值揭歲祲倡富戶出糶全活甚衆甲申國變會南都迎立徵拜都察院右副都御史聞馬士英阮大鍼諸羣小用事辭不就職乃結廬於埔陽之雙髻峯日習禪學與語山道人相酬和絕口不談時事削跡不履

揭陽縣志

卷之六

賢達

二十一

城市垂二十年我朝定鼎簡求遺逸有司入山勸駕有首陽亦是周疆里敢道茹薇不是恩及道人只合孤峯頂臥聽康衢擊壤聲之句夙喜爲詩真樸自矢不假藻繪和平溫雅冲逸希夷其古遠澹宕往往引人入勝晚號樵子所著有瞻六堂集年六十八卒鄉人私謚文節先生子八人多遊庠序

國朝

謝簡捷字子茅僑寓郡城補海陽諸生生有異徵苦心績學工文章藝林重之順治辛卯舉人康熙癸丑進士先是康熙十三年潮鎮劉進忠叛簡捷隨父紹舉間關遠避不污僞命後從王師討賊有功父子俱蒙褒賞至是以進士授內閣中書

李士樸字琢侯梅岡人順治甲午舉人戊戌會魁爲長洲秦編修鉞



所取士康熙庚戌授中書舍人壬子分校北闈所拔多名宿尋請假歸卒生平儉樸持躬而待人樂易抱才華未及展用時論惜之子霞藻工部主事霞蔚拔貢生

余元起字明偉漁湖人順治甲午舉人夙有文名邑宰鄭濂延與羅國珍同修邑乘選蒲城知縣力陳墾荒蠲賦二萬二千有奇請改折米豆等項民甚德之康熙庚午分校晉闈所薦皆名流邑民孟大孺作亂抗官軍以計擒之皆就獲憲司方擬保薦旋引年告歸七十三卒

楊鍾岳號大山官溪人童子時志趣卽與人殊及長資幹敏捷能任煩劇事順治丁酉舉於鄉辛丑成進士授館職後改戶部主事庚戌充會試同考官出監通州倉癸丑擢員外郎督鳳陽稅務立法

揭陽縣志

卷之六

賢達

二十二

詳盡雖積猾吏無敢欺者甲寅擢兵部職方郎中提督福建學政按察司僉事撫臣吳公以公明薦特陞參議旋以憂去服闋起補甫至都門而卒鍾岳善藻鑑取士皆得人其在閩也尤以振拔單寒爲事及門友生有不能自存者每捐貲助之動千百計無艱色其待親族戚屬皆然及以母憂回籍仰其澤者數十家家居三年凡郡邑有大役必與商酌而後舉事後徙家海陽之仙樂鄉曾孫長發進士任主事玉輝舉人

羅國珍字豈藏藍田人自少優文學與兄萬善齊名有大小宋之目舉康熙丙午第四人丁卯邑令鄭濂延修邑志初令武進以憂歸繼補昆明兩任繁劇皆有政聲丙子分校滇闈所得多知名士解組歸與兄觴咏林壑白首怡怡先是十三年逆鎮劉進忠叛據府



城遣數將據揭我師與戰輒失利十四年將軍尙之孝總兵王國棟進駐藍田旋奉文團練有司舉國珍以應國珍承命義形於色奮不顧身卽率子弟兵五百餘人築壘琅山臥戟數閱月戮力助戰越明年省兵引回逆氣益熾國珍被執逼受僞命不爲屈卒亦免於難人謂其文事武備兼而有之云子四人俱成名季子孟震尤能爲善於鄉另有傳

史晟字伯寅在城人康熙丙午舉人選知山西夏縣築城池建義學以父憂歸夏人思之立祠祀焉繼補湖北建始縣建始自明季寇亂繼以吳譚之變學宮鞠爲茂草晟至鼎新之又招徠逃亡戶口給以牛種哀鴻復集日有起色考最陞奉天承德尹地多貴近晟耿正自操境內肅然又以母憂歸卒於家

揭陽縣志

卷之六

賢達

二十三

鄭其崇字懷齋科偉季子幼失怙事母勤孝奉兩兄尤謹登康熙乙酉鄉薦仕中書舍人嫻聲律工書法馳譽京華人得其手迹珍如拱璧乞假歸里日以建祖祠增祭業爲務時出其餘周卹貧乏遇不平義形於色輒爲排解有古鄉先生教里門之風與兄遜溶齊名時稱三鄭長子大瑜自有傳

陳士獻字梅亭磐溪人康熙戊午舉人初授榮縣知縣興學校勸農桑重士愛民兩校蜀闡均稱得士八年秩滿陞南城兵馬司指揮剔奸捕猾善於其職卒年七十七子廷珏拔貢

陳廷國字君聘地美人弱冠登康熙甲子舉人考授內閣中書以母老祿養改授山東臨淄令多惠政癸巳與分校所取多知名丁艱服闋補湖廣江陵繁劇邑卒年七十



許登庸字揆叙號萍川在城人舉康熙己卯第八人出英德令田從典門乙未成進士選授太原令至則首新學校以教育多士體卹民隱惟恐傷之政聲翕然時從典當國聞而深器重之未幾告歸性孝友事父以孝聞弟早沒遺子之邁撫如己出居恆訓誨子弟以恕爲先歲饑嘗設粥以濟貧乏爲榕城山長循循善誘多所成就屢舉鄉飲大賓著有四書節解乾隆己卯重宴鹿鳴一時榮之年八十八卒一堂五代孫曾多至五十三人七子重光登庚辰武科

吳日炎字敬存在城人七歲能文十三補諸生十四登康熙己卯舉人選授湖南鄱縣綽有政聲雍正戊申行取補刑部主事擢員外郎平生嗜學喜著述有浣雪堂稿半秋堂詩

揭陽縣志

卷之六

賢達

二十四

林景拔字彥楚號荆厓霖田人性聰慧日記千餘言十歲能文康熙壬辰成進士入翰林未幾乞假歸揭其廬曰北闕永懷瞻日近南窗聊倚嘯風清手植柳一株自稱一柳主人足跡不履公庭築依萊園日與郡邑諸名士論文賦詩家無儋石晏如也年六十四卒士林私謚曰文清有詩文集各三卷

林德鏞字白菴在城人天資豪宕膂力過人康熙丁酉武闈第二人辛丑會試第九人殿試第一人授二等侍衛乾清門行走加哈哈珠子扈駕幸熱河寵遇方隆未竟其用遽卒時論惜之

蘇華國字燕又藍田人康熙庚子舉人生平重彝倫嘗出己貲建祖宇立祭業入赴春闈至乾隆壬戌登乙榜銓授貴州婺川知縣婺川地素瘠民不知桑帛之利又山路嶽嶇所在叢篁密箐多伏莽



華國至教以蠶織夷其險阻民甚賴之值歲旱割俸倡賑境內獲甦復建義學一區置館穀以教育多士甲子充同考試官稱得人年六十一卒

羅佳雄字世岱號在青藍田人初習儒業復棄去習試伎登雍正丁未武進士初授溫州衛守備清理屯糧釐革陋規大吏嘉之擢天津都司尋調白石口白石古飛狐塞地戶鮮知書佳雄葺署傍舍爲義學捐俸延塾師以教兵民子弟其地向有關稅歸都司收解馱負牲畜並徵佳雄陳於制軍孫公嘉涇減舊徵之半凡馱載及馬牛羊外一概免徵制軍深爲獎異飭勒石以垂示方來推陞西安參將時值大兵西討出關軍務倥傯佳雄戴星出入事皆預籌大中丞陳公宏謀疏列軍功一等上游咸相倚重生平敦倫紀篤

揭陽縣志

卷之六

賢達

二十五

道誼幼失慈惟事祖父母父繼母惟謹每痛祿不逮養至終身不受兒女子生辰一拜先是任臺灣遊擊時乞假歸葬盛暑徒步相卜宅兆者數月既得地負土躬築祭葬必準於禮兩叔父故絕爲之繼嗣立產嘗倡建宗祠以崇祭祀歷官三十餘年囊無餘物後以奔走軍臺勞瘵成疾卒於官奉勘合扶柩歸入城治喪子四人長子楨侯能文早世人咸惜之

孫奮揚字恩成漁湖人登雍正丙午武科丁未捷進士選授福建長福營守備轉台灣約束士卒以時訓練擢貴州永安營都司永安土豪仲姓素強梗與水西頭目隴地諸苗時剽掠爲民害奮揚會同郎岱同知顧光併力督兵擒劇盜宋應龍等二十餘人置於法諸賊竄散不敢復擾民獲謐寧尋陞四川順慶營遊擊前後軍政



兩膺卓異清勤惠愛所至有聲福清縣列入名宦志旣告歸友愛諸弟以名義相勗居鄉修堤築堰周急平爭桑梓賴之能詩善畫時行吟染翰足跡不至公庭舉鄉飲大賓子五人萬璽萬瑤貢生袁鍊字少庚漁湖人少穎悟好學屢試魁其曹雍正乙卯舉於鄉乾隆乙丑成進士性高潔循例請就教丙寅除惠州教授至則日引諸生講論文義娓娓忘倦雅好東坡詩兼愛其書法暇則拈韻臨池輒效其體頗具眉山門戶家故貧俸薪外不名一錢嘗曰名教中多少樂地禮義廉恥人之四維弗思樹立眞乃錯過也故教人必先立品論之不取詭隨在惠入載兼攝陸豐經指授成就者甚衆旣歸杜門却掃益究儒先性學經傳微言善繪事間潑墨自娛得之者如珍拱璧邑長罕識其面有澹臺子羽之風舉鄉飲大賓

揭陽縣志

卷之六

賢達

二十六

楊萬寧字聯國官溪人性沉厚喜讀書少有文譽奉母撫弟以孝友稱舉乾隆戊午第三人壬戌乙榜授海康教諭調感恩秩滿遷名山令未匝月丁內艱起補嘉禾兼權臨武皆有政聲以卓異調繁巴陵巴陵爲附郭首邑地枕洞庭當南北往來孔道差務如織且通省南漕滙集軍民雜處最稱衝劇萬寧愜懣無華而才優肆應一切俱億不擾閭閻徵收漕糧每日躬親查察除向來斗級篩夫之弊縣有堤垸四潦至輒洗刷其高阜處所遇亢旱卽失收萬寧令民按畝出夫夯築堅牢復多挖塘堰以資灌溉兼攝衛守備屯餉及兩護府篆均辦理裕如中丞富公勒渾深才之計典正薦題擢直隸靖州牧格於部議制軍李公侍堯覆題亦報罷署理澧州正己率屬保全圍垸五十餘處民豎碑紀其功時值征剿緬匪派



往協濟芷江懷化等驛馬匹物料著有勞績奉文議叙旋以老成練達有守有爲堪膺表率題准靖州正在赴任並委帶帑銀十萬兩往常沅澧各府分賞兵行地方忽染時疾卒於長沙官寓筮仕二十餘年家無遺產時論賢之

陳步青字雲上霖田人祖國璣伯文藻皆以孝廉通仕籍步青少聰穎兩冠童子試乾隆戊午舉於鄉乙丑會試明通選授海豐教諭調陵水皆雅意作人不染寒氈猥瑣習己巳擢英山令庚午調充同考適縣民結黨剽掠謀不軌聞報大吏飭令出闡馳督丁壯鄉勇起賊巢擒獲百餘人寘諸法因賊首未獲部議革職仍留英協緝當事重其文行延司凌雲書院教垂十三年乙酉奉文免緝開復回籍紳士惜其去各爲詩歌送之旣歸爲榕城山長學優品端

揭陽縣志

卷之六

賢達

二十七

邑士爭矜式之年七十二卒

黃壯略字學三地美人父敦實淳厚樂善人稱長者壯略生而魁梧志氣軒舉乾隆庚午登武科庚辰成進士卽發閩省試用攝汀州右營守備歷湖北宜昌施南兩鎮協中軍擢貴州安籠右營都闖癸巳八月派赴蜀征勦金酋攻克布朗郭宗并取昔嶺功噶拉達札克角等處前後打仗三十餘次立功冊皆列超等定西將軍甚才之方報部議敘乃於是年十二月十八日以勞勩卒於美諾軍營未究其用識者惜焉事聞例與死事諸人同載忠良傳列祀昭忠祠卹銀五十兩予大櫟廕七品監生咨回本省候補把總



## 孝義

孝本天經義實人紀臥冰守樹固出至情易馬償羊豈形德色然事雖庸行踐之實難苟非植性眞純秉姿慷慨愛或衰於妻子志遂變於炎涼史策所垂正自不乏揭陽風氣朴誠人多卓犖其孝義之大者至動天地戢萑苻小者亦循陔採蘭分江濟鮒茲沿乎舊志而加以蒐羅使順德高風長留竹帛亦型方善俗之端也志孝義

明

林祖字述古少孤貧從學張奧元季挈家避亂行遇獠賊母莊氏與弟皆掠去祖追之不及旦暮悲慟籲天誓曰不得吾母奚用生爲明興山海底定祖微行山中至程鄉犬吠輦見矣抱而哭獠人阻

## 揭陽縣志

卷之六

孝義

一

不與潛訴於官遣吏偕往贖之中間十四年矣洪武三年舉明經以母老乞終養十三年復舉孝廉赴京賜衣九襲鈔五百貫授巴縣丞以廉能聞擢河間府判祀府鄉賢

林希蔭字宜民鱷浦人性寬仁自幼能屬文博通五經尤精春秋父客死貸錢扶柩歸葬奉母甚謹母歿廬墓三年有白鳥來巢嬉子千羣聚楹三日弗散妻亡不再娶與海陽林厚友善俱以孝聞永樂朝舉孝廉郡以二人薦謂厚曰君有父母宜祿仕余不逮養奚仕爲厚隨舉進士累官行省叅政希蔭終家食不易志天順間海寇行劫村廬盡焚過其門相戒曰此林先生之家也慎勿犯族兄與鄉人訟郡守召希蔭至涕泣言曰至誠不能化族黨非善也證兄沽名非直也守益賢之晚號樂貧翁著有逍遙歌及二十四孝



七言詩梓行於世祀府鄉賢

周則義藍田人早喪父力耕養母旦夕無惰容遇江鮮野藪必力致之務母溫飽己身或不免饑寒妻嘖言曰何乃自苦爲則義聞遽出之母卒旣葬廬墓三年邑舉人林文以田一區與之曰以優孝子鄉人號其村曰義河村祀孝義祠

周孝少孤問名於母曰吾養汝望汝孝遂以孝名之喜曰吾求爲孝子雖不讀書可也家甚貧力田以養母出入必面率以爲常歲旱邑令屢禱不應或謂當徵孝子禱之禱曰天若不雨孝將自焚言未旣大雨如注民賴有年稱爲孝子粟祀孝義祠

翁孟統鮑江人嗜學好禮事母孝定省不廢母患目眚夙夜禱天每舐以舌數月母目復明祀孝義祠子輔歲貢陽朔知縣

揭陽縣志

卷之六

孝義

二

王實鮑江人椎魯少文家貧以孝養親父病篤焚香籲天割股以進父以爲牛臠也嘗之而愈後父歿甫入斂值颶風作海水蕩覆實抱父棺號泣隨風飄逝後反風飄棺泊岸旁人以爲孝感所致嘉靖六年有司覈實疏聞祀孝義祠

楊最藍田人庠生賦性孝母朱氏患眼眚與妻輪舐翳而復明嘗爲甕牖寢處二銘傳於家舉鄉賓子世喬天啓丁卯舉人

黃文燿字端行在城人爲人忠信敦厚事親尤孝天啓戊子文燿年甫十四值母李氏病甚默禱於神割股調藥以進母旋愈邑令馮元颺獎曰冲齡苦孝聞於提學魏浣初巡按葛徵奇總督熊文燦咸以誠孝獎之

鄧植霖田人家貧力穡採樵以養父母值母病甚恐不起聞割股可



愈遂割煎以進母尋愈後患刀瘡母覺泣曰奈何割兒股無寧殺老身崇正四年山寇竊發家被掠賊有識植者曰此割股孝子也盡釋之孝廉楊世喬諸生許克申等呈於署縣海陽令江愈敏勘實旌表祀孝義祠

國朝

郭天禔詹事之奇次子也弱冠補諸生食廩饒明末寇亂從父走荒域出萬死一生父入交趾被獲將害之天禔以身蔽父刃揮其顙血涔涔不少却泊父死桂林扶櫬歸里負土築塋結茅廬墓事前後三母均能孝工詩文尤善書札喜與鄉族談古禮娓娓不倦老於明經考授訓導未任卒年七十五著有屯園尺牘溪堂詩集

謝名選字欽甫少能文負氣節父士英郡文學患潮陽直浦地瀕海

揭陽縣志

卷之六

孝義

三

寇侵僑寓榕城名選遂補揭邑諸生順治三年值九軍賊破城母李氏素諳經史懼賊污抱石沉河名選急救得免母諭以逃不忍去并爲賊執而母乘間偕其妻陳氏及妹純玉投繯矣賊覺舉刃斷其繩母與陳氏氣絕純玉尙有喘氣嚙舌而死賊昇三屍委城下母越宿逸去而名選不知也賊令名選逼視名選瞪目罵賊曰生爲人傑未殲爾軀死作厲鬼定褫爾魄賊怒支解之事稍平同祖弟上選與父士英收屍城下遺其一月餘母李氏乃踉蹌自外歸相持而泣名選死經年有友人遇諸塗狀貌如生述家人事甚悉友人悟其死也就而卽之忽不見祀孝義祠

孫徽字勤知漁湖人性穎異負不羈才游庠序爲諸生祭酒事父母孝承歡養志鄉族稱之一日母病甚刲股以進未熟而柴盡覓薪



繼之回顧鍋蓋如焚火光滿室人以爲神母食頓愈後親沒斷葷茹素孺慕終身祀孝義祠

謝如晦字養亭梅岡人終身韋布不干仕進性孝友早失怙恃常以不逮養爲恨遍歷雲山以尋吉壤躬負土成塋三年廬於墓側士大夫慕其行誼多宗仰之鄉鄰遇不平事往質之輒爲消釋祀鄉賢子式南貢生三水教諭

黃顯生在城人家甚貧年十二喪母哀毀骨立事繼母如所生父衍宗病夜禱於天願以身代病愈永誓長齋以延父算父歿廬墓三載年六十三卒雍正十二年旌祀孝義祠

孫如錦字維熙漁湖人事親至孝順治三年九軍賊劉公顯等陷邑城父死於賊如錦義不共天破家產變姓名側身山海間數年廉

揭陽縣志

卷之六

孝義

四

得殺父人瀝血鳴官置之法卒祀孝義祠孫奮揚登武進士四川順慶營遊擊奮勵奮持皆登武科

卓伯先字菁岸霖田人少有文名嫻於聲律補諸生事親孝母臥病侍湯藥累月弗懈思所嗜百方求致迨母卒伯先已凋瘵不支呼號屢絕病益劇越二十日卒卒時猶慟哭曰母未葬吾目不能瞑也友人薛超榕聞之爲卜地營葬著有月湄草堂集

陳如謨霖田人孫天鳳漁湖人林雲翊磐溪人呂存恆黃大錡徐士達楊思學俱在城人七人行誼不同事親均以孝著平居溫清定省侍養無間親疾迫於天性先後割股以進邑令張曉鄭濂以其事非庸行止以篤孝匾褒之而未報聞

楊昌時字純菴官溪人歲貢生性至孝居父母喪哀毀骨立每歲祭



墓必號泣而歸弱冠能文崇正十四年受知督學吳貞啓後以明經補薦辭不就或勸之謝曰海上鷗班中鷺意各自適也子鍾岳選庶常萬里貽書惟勗以文章報國不及家事爲人剛介里有不平咸詣質之或稍干以私則指天示曰冥漠中耳目聰明記性長遠宜思量對簿時也康熙三年瀕海民多失所爲捐貲築圍於榕城之西全活甚衆文廟祖祠必先協力營建而後及樓室園池以子官贈奉政大夫邑人高其行舉於有司祀鄉賢

謝紹舉字欽鄰邑監生僑寓郡城少孤貧事母委曲承順得其歡心母沒躬負土爲墳孺慕不已以至孝稱性謙和樂施予篤學不倦尤究心性理諸書鄉人推爲約正生平三建祖祠五創祭業兩舉鄉賓以子簡捷封內閣中書康熙庚子祀鄉賢

揭陽縣志

卷之六

孝義

五

林隆字仲臣漁湖人附貢生事親孝處昆弟怡怡無間嘗建祠以祀先捐穀以贍族屢經縣府提學旌其孝友薦授廣文未任卒

鄭大瑜字君奇地美人中書其崇長子事父母溫清備至居喪三年悲哀苦次服闋雖吉慶不御樂遇諱祭則飲泣屏葷茹素終身如一日博涉羣書不屑屑於章句晚年積廩得歲貢益肆力性理之學杜門靜坐一榻爲穿遇歲饑捐貲於本鄉設賑存活無算有司以聞督撫以繪圖賢裔匾獎之

明

陳鑑漁湖人少倜儻事叔甚恪謹洪武間叔以例戍西河鑑憫其未舉子請以身代後卒於戍所族人義之配祀祖祠

陳邦寵梅岡人嘉靖間歲貢仕六安州同知轉鄖陽府經歷生平雅



重儒道萬歷二十六年見揭學祀典不敷特捐西洋隴頭二處田三十餘畝爲祭費邑令林大經以其好義嘉獎之其後諸生羅拱暘許國昌及劉以亨李應登羅明泰等聞風慕義相繼捐輸以崇祭祀至今賴焉

郭明作在城人庠生好義忍讓與物無競遇橫逆不與較生平薄於自奉而與人維厚稍有餘貲輒推以濟寒士衆皆義之以孫之奇贈副使祀鄉賢

羅拱暘藍田人庠生性仗義敦孝友勤學問天啓間嘗捐租二十七石五斗助祭文廟經提學道張瑋嘉獎義行以子萬傑贈吏部員外郎祀鄉賢

黃夢選號賓玉藍田人性剛毅多膂力勇而有謀少爲諸生食餼十

揭陽縣志

卷之六

孝義

六

餘年崇正初海寇逼城夢選以儒生奮勇擊破之加都司銜值山寇廖輝欽張文斌鍾凌秀葉阿婆等先後各統賊數千流劫諸縣而揭尤甚夢選屢挫折之甲戌縣胥役聚黨千餘爲亂劫庫放囚焚殺慘烈知縣陳鼎新將不免夢選率鄉兵至擒渠魁楊乾叅楊則徵曾清揚等斬以徇餘黨解散論功授碣石水寨都司蒞任四載七百里鯨鯢浪靖以老乞歸會九軍賊破城脅爲渠帥叱拒之不屈死夢選雖以武功顯然素能文曾與太史郭之奇同修邑乘子家駮崇正癸酉舉人

國朝

吳式亨字輝菴原福建同安人遷居地美都崇正間由武庠補揭城西營把總順治三年九軍賊劉公顯等猖獗式亨集桃山地美二



都鄉民築圍桑浦獅山戮力捍禦士庶依附者多賴保全我師定潮劄授叅將駐防揭陽擒殺賊首劉漢益吳元等聞艘入寇相戒不敢犯境後流寇陳拔五等攻鳳山潮陽震動知縣陳之昂牒遣生員鄭作梅等夜渡請援式亨抱病督兵深入賊境爲所殺總督佟養甲題准優卹桃山鳳山俱立祠祀之郭太史之奇爲詩弔之曰自許麟圖異日光安知馬革遂今償諸奴未殺辭金印百戰餘生臥綠槍落日旌旗翻晦彩悲風原野變嚴霜魂雄魄毅終何往空有吳戈誌國殤

林鴻登字文度磐溪人邑諸生性沉毅饒勇略明季盜賊蠭起鴻冕糾合義勇衛固鄉里順治二年九軍賊亂攻寨不下明年邑城陷一衆數萬環攻其鄉者兩月鴻冕率衆堅守伺賊稍懈奮勇出擊

揭陽縣志

卷之六

孝義

七

斬獲數千人賊遁去經年不敢窺其地鄉賴以安時臺灣海寇鄭鴻逵據邑城四年屢招之不應繼而鄭成功巡其寨襲執鴻冕拘留十餘日鄉人以重賞贖之得生還終鴻冕之世鄉無貳志者祀孝義祠

薛然字起藜龍溪人爲人尙氣節仗義義士林鴻冕延爲參謀殺賊安良與有力焉生平博於學輯聞見錄及四書辨疑諸書祀孝義祠

林應世字闇如磐溪人自少孝友補諸生疎爽不羈遇事有卓識順治三年九軍賊劉公顯等攻陷邑城其黨併引衆圍其鄉應世倡族人奮勇禦之自提桴鼓督戰殺賊千餘解圍保全甚衆後登順治庚子舉人將選知縣未仕而卒邑人悼之



李俊芳霖田龍路鄉人少倜儻有氣略順治初寇氛未靖村落多被荼毒俊芳出家財練鄉勇多方捍禦龍路一鄉得保無虞十四年大兵征勦餘寇投軍潮鎮標下總兵王國光給以千總銜劄隨征血戰事平告歸事母辭不就職事母甚謹恪母有姊嫁海豐彭氏孀居無子迎養三十餘年事之如母龍路地處山阜旱田瀕年歉收爲鑿山築陂以資灌溉瘠土變爲膏腴鄉里賴之

鄒祝耀原籍程鄉人徙居揭陽湖口幼喪父母兄嫂撫之成立年十五有勇略効力行間康熙十三年隨大兵討叛鎮劉進忠劄授千總奮勇擊賊多斬獲功事平將有顯擢以兄嫂病辭歸不就職丁巳戊午間山寇蠢動身督丁壯除之鄉里賴以安

楊州弼霖田人孝廉世喬子少補大埔諸生康熙十七年廩貢先是

揭陽縣志

卷之六

孝義

八

十三年滇閩震動宵小乘機竊發聚黨盤踞入鄉剽掠惠潮地方肆爲民害十九年嶺東道仇昌祚檄縣舉知兵者以州弼應乃捐貲團練子弟爲鄉導會官騎剿賊身履行陣經年擊斬千餘級救回難婦五百餘口入鄉以平叙功授訓導職不仕

謝謙字行一邑人僑寓省城少慷慨負勇畧當事廉其才致之麾下康熙十八年海寇楊二等犯儋州檄謙與瓊山令茹鉉協勦謙曰出其不意一鼓可擒也乃佯回棹賊果不爲備伏兵突起大敗之焚其巨艦五擒長毛賊二十七人救回被擄男婦百餘口十九年冬楊二復誘海寇謝昌洗彪李積鳳葉橄欖等聚賊萬餘寇瓊州擾東西路水師總兵蔡璋領舟師援瓊令謙前導二十年二月賊陷海口所澄邁定安諸邑相繼陷將逼郡城人無固志三月初九



味爽謙帥七舟從七星嶺陡下炮若轟雷賊併力鏖戰一晝夜謙奮勇爭先殺傷賊甚衆而大師遲至衆寡不敵身被數十創力窮被執賊素重謙名誘之降不屈死後瓊南底定叙錄弗及謙茹鉉爲文立碑海口所以紀其功

吳梓字采儒梅岡人增廣生康熙十三年將軍尙之孝帥師來潮討叛鎮劉進忠地方困於供億民夫多饑餒從事梓出行營竭力調護存活民夫無算時有射利者開挖錫鉛引水傷禾稼梓率衆禁止保全長富黃藤和尚三坑之田又嘗疏濬梅岡都水源以資灌溉鄉里德之子七人麟瑞附貢德崑茂名訓導

張明傑字宏臣桃山人性沉密有幹材康熙十三年值潮叛鎮劉進忠遣其黨據揭城縱兵擄掠宗族多罹害兵燹之餘叔姪流離奔

揭陽縣志

卷之六

孝義

九

散明傑多方鳩集并爲構宅以居市田以養艱苦備嘗張氏之門賴其再造至今德之邑令劉錫珽舉鄉賓曾孫錦江舉人

楊奇謨字登之官溪人庠生九歲失怙事母甚謹性剛方喜赴義尤敦族誼立蒸嘗建祠宇常以敬宗鳩族爲事康熙初邑令張方聖舉爲九都約正後合蔡端以品行端方褒之子子球貢生子琳瓊山訓導孫步青聯長曾孫集喬俱舉人

陳廷耀字遴客霖田人州同生平重義輕財凡親鄰貧乏者予以資本使之營生遇病者授以藥餌方術喪而無措者衾斂諸費恆周卹之至於捐逋負修築津梁聞義莫不勇行而自奉則極儉約鄉里至今稱之子元才孫子承俱舉人

羅孟震字德宣藍田人貢生以優行選訓導改授主簿遂不仕性慷



慨勇於赴義康熙戊戌與同里謝士豪捐磐溪田六十餘畝入慈濟堂復自捐藍田江厝山一所爲義塚歲飢在縣捐米賑濟并建無祀祠於城東置田租募僧主之又以地畝與鋪屋五間送學宮爲祀典其他義舉尤不勝書邑宰屢嘉獎之

陳元才字漢先霖田人登康熙甲午武科母吳氏仁儉識義鄰里有急恆脫簪典珥以周之每元才出入輒勗力行善事毋忘先訓元才性固任俠喜施予凡遇鄉鄰有喪行旅告窘恆多方爲之矜全雍正丙午大水壞廬墓漂沒人畜無算元才爲疏鑿積阻自柴頭港歷草湖築虹橋以除其患收瘞遺骸於烏目山題曰萬人塚丁未歲大飢設廠煮粥以食飢者有遠道不能歸者量給資斧寒與衣病施藥死給槥佃者蠲租貸者焚券兩載計費千餘金雖質產稱貸弗少悔鄉人勒石誌之又鴻溪港向架木爲梁久輒腐元才節次經紀自河背築灰路迤邐十餘里并輦巨石造天紳橋築書院寺觀於江干舊居棉湖以地瀕於水因徙鴻溪先建祠後卜宅生平口不言錢所至傾四座求田問舍者對之不敢吐一語性嗜書得顏平原筆意晚耽史傳樂以忘老邑令陳樹芝雅重之舉報好義後令王壑舉鄉飲大賓乾隆甲午與重宴卒年八十五子五人子承永年令子佳諸暨丞子俊子偉子儼俱職監



懿行

出汙泥而不染其品潔也。紉秋蘭以爲佩，其行芳也。存雖獨善，其身沒而可祭於社；若遠遊之結締，東坡子從之。溯洄徽國，其最高與叔文名動金華，廷俊學由新會抑其次也。至如旣青絳，冷種李成蹊，袖薄天寒，遺世獨立，含文抱質，亦足風焉。

宋

吳復古字子野，號遠遊蓬州人。父宗統，官翰林院侍講，當蔭得皇宮教授，遜於庶兄厝居。父母憂，廬墓三年，葺治園亭，教養子弟，後謝妻子，築菴居潮陽之麻田山，中絕粒，不睡間，出遊四方，遍交公卿，然一無所求也。每論出世法，以長生不死爲餘事，煉氣服藥爲土苴，待制李師中見之，稱曰：「白雲在天，引領何及？」蘇軾兄弟皆傾下。

揭陽縣志

卷之六

懿行

一

之軾嘗問養生對以曰：「安曰和，且曰邯鄲之夢，猶足破妄而歸真。今子目見而身履之，亦可少悟矣。」軾爲作遠遊菴銘。及軾遇赦還，復古與黃洞輩追送至清遠峽，會道病，不服藥。妻子問後事，笑麾之，翛然而逝，葬於麻田。軾爲文祭之，曰：「嗚呼子野，道與世違，寂然自守，闔門垂帷，兀然坐忘，有似子微，或似壺子。杜氣發機，徧交公卿，靡所求希，急人緩己，忘其渴饑，道路爲家，惟義是歸。卒老於行，終不自非，送我北還，中道敝衣有病，不藥，但却甘肥，問以後事，一笑而麾，飄然脫去，雲散露晞。我獨何爲？感歎歔歔，一醉告訣，遊舟東飛。軾嘗言：昔在冊府，猶及見復古之父，至謫居嶺外，因與復古遊，又得其子芑仲，所爲歸鳳賦，奇之，遂爲忘年交。祀鄉賢。」郭叔雲字子從，漁湖人，始見朱子問格致之要，朱子以原本身心實。



效語之由是一意實踐不爲虛文之學以禮教久廢慨然欲講求而舉行之著禮經疑二十餘條質正朱子後朱子歿與北溪陳淳講先後天太極圖易書之旨考小宗法定世適主祭之議割潮陽汶溝田爲蒸嘗專修四代墳塋忌及時祭一按禮書撫程子所取韋家宗會之說扁其樓曰宗會以爲歲時會合宗人之所又取禮經族食族燕之義扁其寢堂曰食燕祭畢則與其宗人合餽於堂編宗禮宗義二篇及朱子蒙谷宗法各一冊藏於家祀鄉賢明

林仕猷字叔文制行廉潔學博而能文洪武初由儒士授邑教諭陞本府教授善吟咏詩名動京師翰林學士宋濂書云潮去京八千里林君不出州里而予知其所造不旣深乎年六十六卒於官

揭陽縣志

卷之六

懿行

二

祀鄉賢

楊順在城人工部主事學古從弟也以歲貢授恭城訓導永樂乙酉中廣西舉人授長汀教諭致仕歸平生造次不離於正一日謂家人曰爲我擇日我欲還造化屆期沐浴端坐正寢而逝人咸異之吳胄字以監霖田人正統辛酉舉人授武緣訓導諸生多著草履少潛心讀書胄至命入學皆著靴貧者給以膏火俾得專功誦讀邑始有登賢書者後以病歸子裕進士另有傳

林巖字廷俊鱣浦人希蔭季子性剛介有父風補弟子員往從陳獻章講道江門生平恤孤寡周貧乏立家規以聯屬族人勸善以懲不善戒族人無淫博姦盜媚神信佛及火化停喪嫁娶等事鄉里化之著有家禮集說行世



黃勳字守勳藍田人讀書務體要不屑於章句平居無戲言雖盛夏必衣冠危坐成化癸卯舉人丁未授新淦教諭以崇正學爲已任不責諸生贄且周其貧者或疑其矯勳曰廉吾素也豈以顯晦大小易操耶六載遷慶遠府教授益自振厲見郡守長揖而已歲餘謝歸龍山老焉祀鄉賢子一道進士另有傳

翁玉鮑江人以經術著聲嘗說中庸至親親之殺問子萬達曰而視而弟與伯叔弟孰親萬達以差等對玉曰不然伯叔弟同而弟親親仁也其殺者禮也禮可殺仁不可殺萬達悟聞者稱身教云里人陳大玘倡亂郡邑不能禁玉親詣賊巢諭以禍福遂解散萬達巡撫陝西遣使迎之所過盛供張悉令屏去曰吾寒士不習此有邑令獻黃金爲壽求入薦牘玉曰令果賢吾兒當自識之卒不受

揭陽縣志

卷之六

懿行

三

亦不令萬達知他如置義田講鄉約捐貲助賑其事不一累封兵部尙書

陳世俊字鍾英鮑江人正德癸酉舉人授漳平知縣以節財見迂於上司改梧州府教授辭不赴而歸生平不喜聲色居鄉敬老尊賢有以非理相加者亦曲加禮遣前赴京會試時同邑舉人謝天經疾革托以後事世俊爲備殯殮萬里携其妾扶柩而還人皆義之德望重一時子思謙進士另有傳

鄭大崙字峻甫號仙橋官溪人一初子嘉靖壬午舉人從尙書泉甘湛若水遊選德清教諭問教之道甘泉曰問教不如問學未達曰惟學學半故教學之道其致一也子之司教而爲人師也豈非爲模範矣乎曰然嗚呼天下模不模範不範者衆矣天下之士不模



於模範不於範政欲理可得乎曷謂模範曰容止足觀進退足度也語默動靜足法也斯不亦模範矣乎曰斯其外也烏乎化曰道立夫中矩不踰也勿忘以助執天樞也斯不亦模範矣乎斯其內矣烏乎神養其內以達諸外內外合德純一不測感動如神則模範立人斯模範之矣是故爲師者知所以教則爲弟子者知所以學故曰教學之道其致一也是在子之力行耳子其勗哉大崙奉之以行學亦日進旣歸邑令王鳳雅重之延修邑乘

陳璵龍溪人嘉靖中歲貢師事餘姚王守仁得致良知之學歸授徒里中從遊日衆選思恩訓導擢永定教諭教人有則士皆宗之旣歸益勵志節卒祀鄉賢

羅洪藍田人正德初補諸生以學行見稱提學陳欽按臨歲試欲剡

揭陽縣志

卷之六

懿行

四

薦之越三日陳卒不果洪吟咏徜徉山水間有和人歸田詩百咏邑令陶楨教諭黎文會主簿季本見皆推重之舉鄉飲賓

鄭育漸字丹木地美人方伯旻長子萬歷丙子舉人六上計偕不輕投一刺於權貴歸而杜門習靜篤性命之學時先達鄒穎泉龐弼唐湛甘泉高弟也講學天關約招入會值足疾不能赴方伯郭子章勸之仕則以不能刑方隨俗謝之嘗謂柳宗元說車贈楊誨之欲其爲圓有詰者則變其說謂圓其外而方其中不知方圓不相爲用而外內機實相因未有中主旣定隨時輒易毀方爲圓而可制行者迹其生平竟罹叔文之黨則圓誤之也夫人有邪正事有是非持圓之說則將假顏色於匪人借游談於不肖彌縫其拂理之舉寬縱其違法之事不知小人冥頑不靈且愈得意謂君子猶



與之也是我佐之惡也以持身則不免黨惡以當官則不免誤國  
皆圓之害也時以爲名言嘗與郡佐南城王懋中吏部澄海唐伯  
元等爲世美樓之會切劘道德厭聞俗務然關桑梓利病輒遇事  
憤發如上藩使以除鹽鈔啓海令以罷鋪監貽鄉宦以革冒籍至  
今賴之性尤尙義捐學店於庠序置義塚於鳳原友人許光大歿  
故憐其家累捐意溪田並溪稅以贍之其地值荒助賑尤更僕難  
數海陽舉人沈一芝等上其學行遙授都察院都事著有希言草  
許有宙字汝巨號粵石在城人舉萬歷辛卯第七人家世簪纓而樸  
素自守竿牘從不及公門乙丑赴公車遭暴風舟幾覆端坐祝曰  
某生平不作一愧心事命乃終於此耶頃之布帆無恙抵京將考  
選推官旋卒子扶柩歸葬

揭陽縣志

卷之六

懿行

五

袁大敬號澄霖漁湖人萬歷中歲貢授化州訓導上憲器之適化州  
牧缺委之攝篆每閱刑獄心輒惻然遷翁源教諭兩秉鐸皆實心  
課士不計較修脯擢荆府教授以年老引歸囊無長物因吟曰路  
經山徑一囊空野鳥閒花笑我窮我道歸鞭還是富擔頭明月與  
清風舉鄉飲大賓邑令何望海尤禮重之

宋汝翼字志彥號繩勗漁湖人少聰穎日記數千言長而慷慨遇事  
輒義形於色里閭多取平年二十爲諸生性曠達不事家人產家  
漸落猶日縱情詩酒間長子兆禴成進士力持清操不問邑中事  
崇正三年以子貴封廣昌知縣年六十三卒郭太史之奇稱之曰  
古之逸民今之直道以古期今直躬爲導天試之窮公從所好處  
樂無求迺徵其操人以爲知言



郭應試字國徵號首鴻在城人父明作諸生祀鄉賢應試爲人坦易  
勇於趨義時朝廷困於兵餉急公輸納照例授州貳不就崇正庚  
午歲大稔罄廩藏以賑饑遠近就食數千計病不能起者養之僵  
者爲具槥以殮鄉里德之丙戌邑城陷賊過其門曰我等夙受其  
施今以武震之不祥乃相戒勿犯卒年六十三以子之奇貴累封  
如其官祀鄉賢

許有亶字萬石在城人孝廉有寰有宙同懷兄弟也補邑增廣生博  
學能文祖守愚父公望俱以舉人爲縣令有亶承先業歲饑捐賑  
活人以萬計宗祠頽廢割產葺之增置祭田俾祀事無缺其他修  
橋路樂施予垂老弗少衰祀鄉賢子國佐進士另有傳

陳光朝號振寰漁湖人天啓甲子舉人少無宦情不謁選爲人端直

揭陽縣志

卷之六

懿行

六

和厚尤敦族誼有志范仲淹義田而苦限於力乃磊積餘資遇族  
人婚娶喪葬不舉者量爲伙助歲以爲常人謂得文正遺意卒後  
數年寇將陷城先示夢於其子後一家獲免於難子三人德煒歲  
貢德燿德煌俱廩生

袁龍字御卿號魚公漁湖人少負不羈才每試輒冠軍與同邑郭之  
奇宋兆禴王宗昌許國佐等相友善登崇正己卯舉人時寇氛四  
起桑梓多警倡衆守禦賊銜之將并力爲難龍不少動指畫自如  
平生喜吟咏工於詩鼎革後上春官卒於京邸用不究其才士論  
惜之子駿康熙己酉舉人靈臺知縣

鄭科偉字璿夫地美人邑諸生善楷書少孤撫於其祖孝廉漸育課  
以經史攻苦無倦容有聲膠序孝養祖父母備至嘗誡其子曰爾



曹讀書立品須求毋愧清白吏子孫曾祖方伯公忠厚之訓勿忘也生平仗義重氣節後死於郝尙久之亂鄉人私謚敦烈先生

孫耀祖號戒庵漁湖人少狷介不喜諧俗篤嗜於學崇正十五年壬午舉人公車北上中途聞京師戒嚴會場改期遂回軫南邁嗣是國運滄桑瀕年海氛未靖乃督族人築砦扞禦并置竹塢庵召緇侶以衛親塋遂絕意進取閉園習靜日與山僧野叟采真樹藝以終其身吏部羅萬傑云自喪亂以來士大夫惛於驚飈震霆之交加站脚不穩往往從風而靡孰能誓墓剷名嵒光藏彩作泉石育乎予皇皇求友得戒庵一人志同道合以爲末後一段有所倚仗世人徒見戒庵隱居獨善淡泊盟心僅目之爲高人爲清士不知其忠君愛國之誠悲天憫人之感蘊結於中而偶發抒於長林豐草之間嶽崎歷落之際也故以逃禪佞佛當蒼梧鼎湖之悲以鐘魚梵唄當黍離麥秀之謠以衲子田夫當新亭對泣之侶其隱衷苦志自知之而不欲人知之予亦心知之而不欲明言之嘗贈詩云靜裏生涯資竹樹聞中經濟課雲烟蓋實錄也

王玉振字調元漁湖人崇正間歲貢自少內行謹飭以學問知名一時而道器淵深人莫能測其際授生徒甚衆講關閩濂洛之學出其門者先行誼次才藝多取青紫去玉振獨困諸生所得修脯盡散於故貧乏以子宗昌贈天津道參議康熙七年入祀鄉賢

孫充益字醇果漁湖人性淵靜生平孝友慈祥與人藹如也讀書於經史咸淹貫旁通六藝然不欲見聞習靜不應有司試善楷法一時人士多宗之



國朝

鄭匡夏字彤石地美人方伯旻曾孫順治甲午舉人生平好獎引後學敦篤故舊時海濱鯨波未靖郡邑有大事有司咸諮之抵掌高談多切中利害考據古今甚精核郡守吳穎嘗語人曰與鄭君談如讀酈道元水經注名山大川無不貫穿周悉其心折如此著有元白草工書法爲時所珍

羅明倫字德振號未能藍田人生而穎異爲族叔吏部萬傑所器年十二補諸生順治庚子康熙癸卯兩中副車無幾微缺望意爲人溫厚和睦事父母與繼母俱孝謹得其歡心嘗捐田二百畝爲兄立嗣其悌弟尤人之所難

許茂繫字誠齋在城人事繼母以孝聞撫兄子如己出族有虛糧逋

揭陽縣志

卷之六

懿行

八

負者時爲代輸憫貧乏無葬地特捐西關外腴田十餘畝爲義塚力崇正學尤邃於尙書值世變海氛未靖潛居山谷教授生徒垂二十年不出應有司試嘗語人曰吾老矣其窮經傳後乎卒年七十五祀鄉賢子登庸進士另有傳

鄭遜字魯城地美人科偉長子歲貢生授保昌訓導課士以敦行爲先聞浮夸蕩檢者輒戒飭之士習爲之一變丁內艱歸值海氛不靖濱海民多受荼毒率鄉人力爲保護里賴以寧

鄭溶字崇瑤科偉次子拔貢授萬州訓導以學宮垂圯捐橐興修知州朱之棟爲文紀之蒞任十五載以善教稱生平力學垂老不倦秩滿遷曲陽丞以年老引歸

楊世榜字名園霖田人事祖母及父母皆能盡孝群從子姓食指百



餘人同居不析財性好學課督子弟寒暑弗輟以貢生授行人司副多爲鉅公所器重居鄉務忠厚周窮赴急好行其德鄉有土堡圯傾不惜貲修築之宗震廩貢生

林逢熙字登翔霖田人康熙庚午舉人生平虛衷善下淡薄自甘稍有餘貲卽出以購書籍終日手一編風雨弗輟也林爲邑巨姓時以理法約束子弟戒其非爲有不從者卽不與交一言以愧之人稱有道君子云選授花縣教諭未任卒

羅萬善號子臧藍田人康熙甲子舉人考授內閣中書後改授知縣辭不就職酷好讀書湛於學問家居日事吟咏性恬澹有司罕覩其面遇歲荒散所儲於碩浦碾米分給人多受其惠捐建祖祠修葺祖潭堤決所費皆不貲享年九十一子昌齡歲貢東安訓導鳴

揭陽縣志

卷之六

懿行

九

鑾貢生石門知縣松標舉人

吳文郁字偉周霖田人康熙戊寅拔貢鍵戶讀書不干外事文章醇正冲雅學者宗之性孝友與人恂恂雖遇橫逆不與校人與交者如飲醇酎年四十卒太史林景拔贊之曰品行端方胸無城府得其人矣

余之麟字蔚呈漁湖人由康熙壬午副榜登乙酉舉人博通經史爲文章根極理奧冥搜旁訊不苟下筆兼工詩賦性忠厚內剛外和日溫溫無疾言遽色未仕卒

李嘉字泳是在城人性孝謹弱冠補邑增廣生旋遊太學康熙戊午鄉闈幾得復失爲人狷潔而樂施予待朋友尤善父貞澍邑諸生營建祖祠嘉拮据襄事族德之嘗延賢師以課勵族人自是多彬



雅士著有家訓十則及惜字文太史李象元學博黃進爲之序當事重其品以優行可風表之子岳花岳英皆貢生岳英候選知州黃煌色字宏昭霖田人好義急公康熙甲寅值逆鎮劉進忠叛流寇出沒惠潮間能倡率防禦六約地方賴以保全後任約正二十餘載人咸取平焉

張鼎臣桃山人夙好義康熙甲寅兵燹之際族多逃散不惜變己產以代供輸吳逆旣平族衆漸復買田償之辭不受年八十二授冠帶

陳王猷字若思霖田人通經史兼涉藝術尤精青烏家言凡卜兆建祠就其諏度皆不憚勞臨視盡言以告人敬禮之子廷紹廷耀孿生俱州同孫來鳳元才先後登武科

揭陽縣志

卷之六

懿行

十

孫敬德字充信漁湖人秉性和粹子姓爭競嘗以理言相感化都里咸倚重之署令魏能定舉鄉賓年九十卒

余學善字美哉漁湖人爲人淵靜有謀當滄桑之際設法禦賊保全鄉里邑令鄭濂舉鄉賓

楊德賢字潤之霖田人少孤事母克孝與兄友愛同居數世有古義門風嚴課子孫多遊庠序邑令鄭濂舉鄉賓

林元掄字正籲漁湖人孝友性成好施予親沒旣葬後不時臨墓省視每祭祀必盡誠敬雖髦不少衰子英麟舉人上猶知縣

鄭養性字帥堂梅岡人太學生性孝友積學篤行康熙辛丑吳門惠士奇來督學掃除從前一切積弊取士公明崇尚經術養性以所註周禮左氏等書呈之稱爲開粵風氣之先蓋是時機注盛行士



不復通經汲古率以虛喝取時譽養性獨究心典籍爲文經營慘澹法律甚細而持躬嚴正亦如之子三人大進官直隸總督大達鹽大使大遴貢生孫維祺州同維祐戶部員外維賢經歷維祉知縣維則舉人

楊世達字輯五霖田人附貢生任遂溪教諭勤於作士學有祠租二百石推與諸生爲科舉費遷河南登封令歷永城湯陰皆有善政得士民心告休歸創建遠近橋梁一十餘處雍正丙午丁未歲歉倡賑設粥多所存活鄉人立碑記之子有祐滄州知州

李仕義字行可在城人性明敏淹通經史雍正丙午舉人志意高尚非公不見邑宰屈選期不赴授徒里中一時學者皆宗之年近九旬齒德兼優舉鄉賢

揭陽縣志

卷之六

懿行

十一

陳萬盛字君冕增廣生原籍海陽人來榕設教因家焉性孝謹侍母疾衣不解帶累月尤敦手足誼仲兄元璵早逝嫂孀姪幼貧不能自存萬盛乃請於父天純願於分產中揭以益仲而躬庀其家後父終文昌學任間關扶櫬哀毀骨立悲泣無已時嘗客羊城有友人謝某忽發癲疾狂不可制同舟皆散去萬盛慨然曰無事則相依有事則相棄於義何居獨留調護旬日獲痊咸以氣誼高之卒年六十六子三人嵩齒食餼先卒雄略舉人雄思廩生

李稱先字坤載霖田人歲貢生性純摯事父母維謹學粹品端四方士爭從之遊理解精詳經指爲文皆有法度每一學聘至必稟承親命始行所得修脯先備甘旨以進及親年邁則不忍離左右至喪大事不求均於手足生平安貧守業未嘗輕投一刺於要人人



庶幾有道氣者人益仰重之子四人景白邑廩生

鄭養心字簡在梅岡人乾隆戊午舉於鄉少嗜學博覽群籍深研理法與兄養性相師友雖疾病手不釋卷爲文平奇濃淡隨時所趨而一出以和厚之氣性至孝一言一動必求得高堂歡尤善事兄長友愛其弟待族屬疎戚無間言未仕卒

鄭天濬字侯邁地美人附貢生少明敏初就塾讀書輒能見大意既補諸生益自刻苦爲文綽有風致屢踏省門卒不遇乃援例入辟雖生平事父母克謹與兄弟共財數十年嘗以己子爲伯兄後後季弟艱於嗣復割所愛無難色至於修堤築堰恤災惠鄰皆踴躍爲之有仁厚之風子新喬新庭皆貢生

楊有偉字瑞挺霖田人監生賦稟樸醇聿修倫紀與兄明經宗震以揭陽縣志卷之六  
文義相切磨顏齋曰談經老益嗜學用能祇承先業弗墜家聲自奉甚約至於建先祠置祭田事屬報本則不惜傾橐爲之子正笏庠生

黃世謨字允明地美人貢生賦稟謙恭無疾言遽色家庭雍穆常以刻薄寡恩爲子弟誠品端言慎素重於鄉評鄰里以是非曲直相齟齬者就質之往往息訟邑令黃元基舉爲族正人畏爲所知有事恆不使知之有陳仲弓在潁川之風子壯猷武進士壯圖貢生陳天成字瓊先霖田人貢生品潔行芳少穎慧操觚頃刻千言常謂我以文史爲富見脂韋輩不少假辭色興到則焚香烹茗鼓瑟歌詩名齋曰月窩置怪石異花於庭際若將終身弱冠補諸生以辟雖老無幾微不平意蓋恬適其天性也子子浩貢生



楊子琅官溪人監生事父母左右就養克盡孝道生平立廟修祠與一切善事悉喜爲之嘗肄業太學善書法聲譽著聞垂老手不釋卷治家嚴整教誨有方雍正壬子舉族正邑令陳樹芝雅重之壽八十子步青聯長孫集喬俱舉人

劉學遴霖田人貢生裊躬方正崇本始敦道誼嘗捐產爲祖祠聞人善事每樂助而贊其成凡邑中義舉如興修文廟題貯社穀整築橋路等事輒踴躍以爲人先閭里稱之

陳元和字爾占霖田人邑庠生性狷介援例授主簿借補平南縣大烏巡檢地有牛稅向來司此土者皆藉之沾潤元和至卽除去或謂此舊例何矯廉且難爲後官地元和曰此民蠹也吾纔入署門卽營家計耶後以艱歸起補福安縣白石司清操益勵兩任共十

揭陽縣志

卷之六

懿行

十三

載民悅之引年回里年七十七卒

謝獻玉梅岡人監生性耽圖籍疊疊弗倦旣而無所遇乃援例入成均晚見少年勤於弦誦者輒嘖嘖稱羨嘗曰古今惟爲善最樂子弟能讀書便佳鄰里有鼠雀之爭必力爲勸解遇親朋告急囊卽羞澀未嘗以乏辭衆舉爲族正

孫國武在城人好學能文艱於遇合垂老更闌燈炮猶披誦不衰夙有至性事兄如事父天寒拊背絕少分甘嘗以公屋讓兄獨居兄轉質於人亦恬然無間兄歿喪葬費皆已任撫姪無異所生教授生徒尤稱善誘紳士多之具其行於督學乾隆癸酉署令武啓圖獎以望重鄉閭



鄉善

陳志有褒善一門蓋緣雍正丙午丁未連歲歉收斗米昂至六七錢貧民乏食郡邑皆開倉平糶分廠濟飢紳士慕義接踵而起或捐米於縣或設粥於鄉得同井相周之義黃志沿其文而凡救災惠鄰捐嘗建宇以及修橋整路施檣掩骸諸事俱行附入今仍之而更曰鄉善古人云勿以善小而不爲觀於此可油然而興矣志鄉善

楊有禔字瑞慶霖田人貢生性仁厚少孤遵母訓維謹能以任卹爲心雍正丙午歲飢斗米六七錢貧民乏食有禔出貲於本都設廠煮粥十日食畢路遠者將歸人給錢六十丁未復飢亦如之兩年計費一千六百兩有奇子哲聘候選州同哲鳳湯溪尉

揭陽縣志

卷之六

鄉善

李岳英字偉亭在城人貢生舉薦優行仕昆明州州判捐卽用知州改光祿寺署正不就雍正丙午丁未歲飢首倡捐賑邑令陳樹芝於凡在縣設粥者列榜通衢獎之以岳英爲第一

陳強字毅川霖田人幼失怙長習韜鈴登武進士以事母不赴選孝友性成敦隣睦族丙丁飢出米以濟又嘗築橋梁修道路都里勒石記之子文峯登武科

楊宗雯字瑞賀霖田人性倜儻登武進士任重慶右營守備轉定海守備歷浙江瑞安都司雍正丙午丁未捐米八十石有奇以賑饑貧里鄙咸沐其惠

李霞藻字彰園梅岡人貢生由饒平訓導歷工部主事父士樸以名進士任中書素有家教霞藻幼承庭訓識大義雍正丙午丁未歲



饑出穀協賑

謝出類梅岡人性英邁有勇略登武科雍正丙午歲饑捐穀入城助縣分賑後登武進士

陳來鳳字儀先霖田人登武科性揮霍存心濟物遇貧乏告貸鍾釜區豆恆無吝色雍正丙午設粥於本都就食者德之子子元貢生陳萬善字元長霖田人候選州同行誼以愬謹聞雍正丙午歲饑出穀二百石在湖口地方平糶每石減錢三百文又捐米一百五十石分惠鄰里人皆德之子六人以頌衡州府經歷名顯以穎以碩皆貢生

郭光祖霖田人候選州同好行善事雍正丙午捐米一百石在城協賑於本都設粥五日遇善皆竭力爲之子朝鳳河南府通判朝玳

揭陽縣志

卷之六

鄉善

二

貢生

李國柄在城人監生任山東茌平縣丞性喜施予雍正丙午歲荒捐穀六十餘石協賑丁未亦如之

邢朝鳳在城人監生選授鳳陽縣丞未赴任雍正丙午丁未疊饑捐穀協賑出其所有減價平糶又儲穀百石於當社其他捐助尤多如修雙峯寺東關外石橋及一帶灰路皆不惜重貲以要其成鄭大璫地美人恩貢生任會同縣教諭植品端方雍正二年舉報優行學使鄧鍾岳深獎之丙午丁未間歲飢設粥於本鄉賑恤閭里賴之

孫庭俊漁湖人貢生候選翰林待詔雍正丙午丁未歲飢捐貲協賑遇貧乏輒施櫪或修塚掩骼閭里稱之



林仕科磐溪人監生雍正丁未歲荒見鄰里匱乏者或施米或予錢  
嘗捐產爲祭祀出貲修橋路閭里咸稱其德

孫廷相漁湖人雍正丙午丁未連飢或出粟以濟或施槨以埋邑人  
戴之子容光已酉舉人永定知縣

陳名顯霖田人附貢生雍正丙午歲飢多爲棺槨以給無告者人稱  
其長厚

朱學俊在城人候選州同雍正丁未歲荒首爲倡義勸賑人賴以濟  
其他施棺掩骼善事猶多云

曾學思字大經在城人雍正丁未設粥以濟飢又助貯穀於當社邑  
令屢獎之

陳國標字伯允霖田人候選州同與弟庠生國補貢生朝柱雍正丙

午歲飢共捐米一百石有奇在縣協賑

黃元長字子善藍田人庠生雍正丙午歲饑在縣分賑二日又出穀  
入縣倉減價平糶

羅元輯藍田人候選州同陳廷誥官溪人監生楊鶴亭官溪人貢生  
孫家棟漁湖人候選縣丞馬麟光霖田人監生呂奏成霖田人候  
選州同林學成霖田人監生楊萬春官溪人監生林高翔磐溪人  
監生黃佑藍田人庠生陳廷銓在城人趙氏生員林國榆妻郭道  
鑣在城人與監生郭道銳附貢生郭必達俱設粥在縣城

郭學宣霖田人監生鄭淮地美人副貢生鄭世美地美人貢生鄭士  
宰地美人監生鄭陵岡地美人貢生鄭應璧地美人歲貢生黃忠  
偉桃山人監生宋宏善在城人監生俱設粥在本都



已上俱雍正丙午丁未捐賑

余學暹字延祚漁湖人性嗜義喜施予鄉黨稱爲正直士一日遇遺金百餘兩於地候遺者至還之生平博學嘗廣演經史著箴銘以啓學者族戚賴其扶植者甚衆子元起舉人蒲城令

陳進德漁湖人輕財重義能持公論閭里搆爭得其一言輒解嘗與商某同舟商遺白鏹進德不利其有緘守以俟其還後商舟遭風覆沒進德獨獲免人以爲好義之報

李廷璋霖田人邑諸生康熙壬辰潦水爲災所在傷田宅民多失所無可借貸廷璋特蠲穀千餘石分別周卹之一方賴以安又數施棺木修橋路年八十餘好義無倦容

林琮瑞磐溪人性嗜義所居喬林村山路崎嶇行人苦於跋涉爲開

揭陽縣志

卷之六

鄉善

四

坦途二百餘丈中甃以石又建後埔橋三座往來便之前後所費皆竭力獨爲康熙壬辰年九十賜冠帶

鄭大垣地美人慷慨好義嘗捐貲開濬溪源使都屬田苗有備無患鄉衆勒石紀其功

李興友霖田人性朴誠長厚遇歲歉輒出粟減價平糶鄉里賴之年八十一子二十九人曾孫著武舉聯元歲貢

林名遇生平尚義修橋梁除道路掩露骼施棺槨建無祀之祠捐產爲祭費多有可稱

黃鼎輔桃山人貢生憫桃山無文社士風不振乃捐貲創書院以招來學登岡橋路當北境之衝歲久傾圯捐貲倡修之其餘建宇爲祖祠捐田作祭業尤多義舉邑令陳樹芝任爲約正



陳焜耀桃山人監生性務義遇雍正丙午歲饑捐銀三百餘兩以濟鄰里貧乏又捐銀七百餘兩置租穀三十餘石給桃山書院諸生膏火衆咸義之

江興字采士藍田人貢生性好義見猴子糞路爲揭陽至嘉應必經之路願阻於崇山峻嶺延袤險仄遇泥濘行益困乃呈請有司願捐已貲通甃以石自石角西坑店前至逕心松棚鋪七十餘里於山溝起梁費銀二千餘兩經營五載乃底告成里人勒石誌之李士茂磐溪人監生父早沒母林氏遺腹生長事母甚謹好行善事嘗捐銀一百兩募銀一千三百兩倡修縣之西偏石路自大溝橋至員岐二十餘里由德喬至南塘山十餘里共三百六十丈拮据營辦歷半載而始成行人便之

揭陽縣志

卷之六

鄉善

五

孫家盛漁湖人貢生性喜赴義嘗甃橋闢路以利行人鑿田疏河以引淡水築堤填堰以裨農畝所費旣多復不辭勞瘁梓里稱之許登元在城人候選州同兵部主政國佐孫也與堂弟太原令登庸相友愛性公愼有斷九都紳耆推爲約正事多取平登庸嘗曰予宰太原兄調梓里均無愧家聲云雍正丙午歲荒倡設粥廠於韓祠人藉以濟署縣柴瑋以望重榕江匾獎之

孫世俊漁湖人監生乾隆四年有鄉鄰鄭乃誠質田負欠無償思鬻子以贖世俊不忍離其骨肉慨返其券知縣熊約祺高其義獎以仁讓可風孫丹鳳庠生

林世璋在城人貢生曾充九都總約正平心處事遇歲飢調劑平糶邑令黃元基舉鄉賓



林振湖漁湖人貢生見南條中路西港四橋日久崩陷礙於行人捐貲修復乾隆辛未壬申歲歉出穀減價平糶所濟宏多

魏以德漁湖人乾隆壬申歲飢出米數百石在縣減價平糶邑令顧彝以惠濟鄉鄰匾獎之

李應春在城人監生純謹好學督課子弟一門四十餘人皆敦詩說禮乾隆壬申歲荒捐米三十石以恤飢貧邑令龍廷泰舉鄉賓

劉世德霖田人監生候選理問嘗捐修龍車溪渡頭及大壩路橋好行善事邑令劉業勤舉鄉賓

楊紹圖桃山人氣量溫和篤於內行嘗拓蒸嘗以崇祖祀指困廩以濟貧親每值人爲善事輒慫恿以成其美性嗜經籍雖屢試困於有司而力學弗少懈士林稱之子開穀貢生

揭陽縣志

卷之六

鄉善

六

謝捷榜在城人秉性尚義曾拾古溪鄉人陳元棟銀一百兩乾隆戊子又拾普寧庠生林國楨銀二百兩皆慨還之欲析半不受酬以幣帛亦却辭舉人孫文捷等僉呈到縣邑令劉業勤覈實給廉介可風匾獎之

許宜璧霖田人監生候選理問生平凡遇建亭修路以及平糶協賑諸務皆量力而趨爲之

馬有寵霖田人貢生與弟有容同捐貲築建路亭以便行人



揭陽縣志卷之六下

耆壽

壽爲天地醇固之氣造物不輕予人故箕疇以之首五福在昔有虞氏以燕禮夏后氏以饗禮殷人以食禮周人修而兼用之引年之典有自來矣我

國家尊高年敬有德異糗膳賜品秩比前代有加記曰朝廷敬老則民作孝頌白不以其任則弟達諸道路况夫耄耄家之祥也國之瑞也見聞最古閱歷宏多父兄之教旣先子弟之行始謹可曰老夫灌灌而罔典型視之耶志耆壽

明

林進之龍溪人庠生壽九十二舉鄉賓子維翰舉人

揭陽縣志

卷之六

耆壽

一

孫醇翁漁湖人年二十時因高祖墳山在普寧被土豪滅佔屢控弗伸隨跋涉叩闕事下有司覆勘得直朝廷嘉其誠孝錫以冠帶壽八十振陽振岡俱裔孫

鄭義官溪人壽九十三舉鄉賓孫一統嘉靖乙未翰林

謝光賓桃山人監生任武寧知縣壽七十五舉鄉賓

鄭大忠地美人庠生雅州知州天憲子性孝友嘗置義田以資族屬無力婚喪者平生精於痘疹愈不受謝人咸德之壽八十四舉鄉賓

羅仕傳藍田人壽九十三賜粟帛舉鄉賓崇正甲戌進士萬傑其七

世孫也

陳若山官溪人生平厚施薄取人多被其澤隆慶中有寇至其門相



戒勿犯時海陽通判張大會寓揭城上其事於當道壽七十賜粟帛冠帶

余國明漁湖人壽百歲萬歷丁未賜粟帛冠帶復一丁侍養子一議思明府教授

曾守基在城人壽百歲賜粟帛冠帶復一丁侍養

黃椿壽九十三賜粟帛冠帶

謝敬初梅岡人壽八十孫嘉賓萬歷戊午舉人臨武縣知縣

曾信在城人壽七十八子思道萬歷丁酉舉人

黃以裕在城人壽九十賜粟帛姪仕鳳萬歷壬午舉人湖州府通判

盧一翰霖田人壽九十賜粟帛子應科訓導

曾大德在城人壽七十子敬天啓丁卯舉人任東鄉縣知縣

揭陽縣志

卷之六

耆壽

二

謝紹傳庠生孝友性成屢經提學府縣申獎壽七十賜冠帶

林秉樂磐溪人素敦行檢年九十三賜冠帶

吳以汀梅岡人壽七十三生平識大義嘗拓祭田創社學賑飢施槥

賜冠帶舉鄉賓

林有槐桃山人庠生壽百歲一堂五代孫曾百餘人賜粟帛冠帶邑

令馮元颯舉鄉賓

盧應科霖田人庠生壽七十八遙授訓導舉鄉賓

王君恪桃山人壽八十嘗捐貲助築七鄉崩岸衆勒碑以紀之舉鄉

賓

莊儀禮在城人壽九十三 林伯強壽九十 王臣桃山人庠生壽

九十二



國朝

林大茂磐溪人順治六年歲貢自幼試屢拔前茅著書立說誨人不倦人稱端士壽七十五

羅鼎明藍田人郡庠生秉性剛方約己厚人樂善好學壽八十三子萬善國珍俱舉人

黃師印藍田人性敦孝弟曾創建祖祠并立嘗產壽七十八康熙間邑令劉錫珽給匾獎之

林鴻瑤藍田人傳家禮讓和睦鄰里教誨子孫濟濟多才壽一百歲孫方穀漁湖人生平篤好學問課督子孫多列庠序壽八十三

林臣漁湖人壽九十子喜霖康熙癸巳舉人

陳子瑜霖田人崧光守璞不喜華縟壽八十六子文藻康熙辛卯舉人

揭陽縣志

卷之六

耆壽

三

人

李俊耀在城人壽八十六與賜肉帛孫仕義雍正丙午舉人

李懷肅在城人壽八十四與賜肉帛孫衍泌貢生任高明教諭

吳效爵梅岡人性好義嘗捐建社倉壽七十三授冠帶舉鄉賓子雲

翺貢生任香山訓導

林尙鐫漁湖人行誼夙重於鄉評縣府咸獎之壽八十六舉鄉賓子

毓芳貢生壽八十五與賜肉帛

李世瑜在城人監生厚性寬中含光弗曜人多矜式之壽七十三舉

鄉賓

林宏明霖田人溫厚好善篤於內行族黨稱之壽七十二舉鄉賓

鄭肩維桃山人素重名檢壽八十舉鄉賓元孫行健乾隆甲午舉人



陳王文霖田人友愛兄弟持己端方鄉鄰有齟齬者得其言輒解匪僻尤憚之壽八十五舉鄉賓

黃逢泰藍田人監生行己端方充通都約正同妻盧氏俱壽九十一舉鄉賓

孫君壯漁湖人謹於事親康熙初海寇擾亂父爾藏母李氏均垂暮驚惶奔竄多方調護卒得無恙嘗拾澄海過商百餘金慨還之弗受謝壽八十四授冠帶

李其造在城人父母各八十餘左右奉養甘脆罔敢有缺壽八十郭日績在城人詹事之奇孫性行淳正恬淡守儒素鄉黨舉族正爲矜式著有未若齋詩草壽七十七

孫大鳳漁湖人孝友垂訓增置祭田撫卹猶子都里重之壽七十八

揭陽縣志

卷之六

耆壽

四

林應宏漁湖人庠生性敦孝弟嘗建宗祠置義田以鳩族衆遇貧乏輒量力周之壽八十三

謝嘉龍梅岡人性剛直而能和睦鄉里課學有規子孫多列庠序壽八十七

李貞澍在城人郡庠生早失怙恃事祖母以孝聞約己濟人族屬賴之壽七十三子嘉喜俱庠生

陳國卿霖田人庠生壽八十三孫強雍正癸卯武進士

吳若賜在城人忠厚誠樸人推長者壽九十一

陳平之在城人相傳曾拾遺金於路俟客還人稱長厚壽九十五

陳逢泰梅岡人附監考授州同爲人以剛正稱於時壽七十五子光祖歲貢光正舉人



林正華藍田人恆以醫藥濟人壽七十二雍正丙午歲荒妻沈氏捐米二十五石在新亨墟分散飢貧

黃垂裕地美人性溫厚仁和利人濟物善行素著壽七十二妻陳氏壽八十六孫壯猷壯略俱武進士

楊子珩官溪人監生倡貯社穀以備歲荒散給族舉約正事多取平壽七十二

陳王昭霖田人生平建橋修路周急睦鄰鄉里賴之壽八十五

孫永藩漁湖人候選州判生平孝友嫺睦賑荒焚券事多可稱壽八十三

李國權在城人監生爲人寬厚誠實篤學嗜古教授里閭多所成就壽八十三

揭陽縣志

卷之六

耆壽

五

陳世綱漁湖人持己和厚好爲人省事聞鄉鄰有鬪輒緩頰解之居家謹飭惟以督耕課學爲事無片紙入公門遇貧寒告貸則量其力爲推解未嘗有吝色年八十二儒學詳其行褒以耆德可彰

孫虞聲漁湖人庠生事親克孝與人溫恭任約正二十餘年行不偏倚工文章有聲庠序邑令蔡端以行高詞壇獎之壽九十三孫公助乾隆壬申副貢

林宗金磐溪人貢生性孝友能和睦其族嘗出粟平糶屢修理橋路壽七十六子六人振翮萍玉庠生國選國進國運國達監生

孫嘉猷漁湖人監生捐管業修祖祠雍正丁未歲飢出粟百餘石在鄉分給人賴以濟壽七十二

林世雄地美人貢生性溫厚歲飢出穀平糶壽七十



謝名嵩在城人監生性情溫雅嘗仗義以救人行事無偏倚壽七十  
五妻劉氏八十四

莊得球在城人爲人詳慎壽八十五孫印光雍正壬子副貢

王鳳岐藍田人監生歲飢平糶義捐社穀壽七十四

陳良謨地美人貢生性好學有隱德壽八十一

孫仕隆漁湖人性孝友明書義邑令陳樹芝素重之壽八十三

鄭鏤地美人監生性好學以孝友型家壽八十三

侯宗耀霖田人貢生孝親睦族嘗竭力以賑施貧乏壽七十四

林獻會磐溪人監生年高德邵壽八十八孫鍾亮乾隆甲子登武科

孫憲夫漁湖人習儒業好行其德壽七十五妻王氏八十七乾隆丙

辰與賜粟帛

揭陽縣志

卷之六

耆壽

六

余運璉漁湖人監生和睦族黨平爭息訟邑令熊約祺獎以義門碩

德同妻江氏俱八十三與賜粟帛

蔡元泗地美人濟困卹孤垂老不倦壽八十七

林騰鳳磐溪人貢生捐助社倉修理橋路皆樂於從事壽八十一

王吾先藍田人嘗捐建陳厝圍倉廩一間以貯社穀壽八十四

陳世俊磐溪人監生雍正丙午丁未歲飢屢出所有以濟鄉鄰壽七

十一子春光監生

黃傑者漁湖人賦性和平夙敦名誼與妻江氏俱壽八十八

林文起桃山人監生性端方衆舉族正垂暮好學不倦壽九十八

黃萬英漁湖人庠生敦品嗜學督課子弟多有成材與妻胡氏俱壽



邱元俊官溪人庠生壽九十六屢賜粟帛

蔡廷魁地美人敬親愛弟遇荒卹鄰壽八十二授頂帶

孫教漁湖人篤行好施壽八十九授八品頂帶

黃崑藏藍田人淳靜寡營與妻林氏俱壽八十五授八品頂帶

王國璋在城人庠生壽八十四與賜肉帛

黃宗有藍田人庠生濟人睦族垂老不衰與妻俱壽九十授八品頂帶

陳仕志在城人增廣生壽九十二與賜粟帛

王周成藍田人賦稟慈厚嘗捐地與族衆建祠壽八十授頂帶子宏通庠生

郭注莊霖田人庠生壽九十二與賜粟帛

揭陽縣志

卷之六

耆壽

七

王淑園桃山人稟性好善持已端方壽八十五授八品頂帶

劉世振桃山人雍正丙午歲飢捐穀協賑署令柴瑋獎之壽八十五

乾隆丙辰授八品頂帶

謝天官桃山人傳家孝友植品端方乾隆丙辰授八品頂帶甲戌壽百歲給坊價三十兩加賞緞一疋銀十兩妻黃氏壽九十八建坊於本都

孫士奇漁湖人勵志力學教授鄉里善於誘人壽八十三乾隆丙辰授八品頂帶

林志上磐溪人貢生舉爲約正能息爭訟歲飢出粟平糶捐助社倉以及修祠築路事多可稱壽八十三

林秀芝磐溪人監生生平好集先正格言不喜術數與巫覡道路溝



渠屢有興修壽八十四

林秀華磐溪人監生性孝友樂善好施平生隻字不入公庭壽八十

一

林秀麗磐溪人監生建祖祠置嘗產濬渠修路皆樂爲之壽八十四  
孫家榜漁湖人貢生守樸嗜學都里咸稱其齒德俱優壽七十八  
姚瑞長漁湖人誠樸正直壽九十二乾隆丙辰授頂帶

吳秋園桃山人嘗修理橋路捐田爲祭產壽九十二乾隆丙辰授入  
品頂帶

莊韶光在城人監生生平嗜學好義雍正丙午出粟賑飢乾隆戊辰  
減價平糶邑令屢獎之壽八十

林宏勳霖田人監生五歲而孤事母維謹砌藍田徑頭一帶石路以

揭陽縣志

卷之六

耆壽

八

利行人壽八十七子夢蘭志高有鳳孫斌濟士雄俱貢生志高乾  
隆壬申捐米二百石平糶邑令顧彝以市門分惠匾獎之子鴻猷  
鴻畧貢生

孫時憲漁湖人雍正丙午歲飢出穀平糶在城設粥署令柴瑋獎之  
壽九十二授頂帶

蕭殿芳在城人植品端方壽九十三乾隆壬申授入品頂帶孫步雲  
舉人

林平州桃山人庠生壽九十一與賜絹帛

黃峯在城人與妻潘氏俱九十二乾隆壬申授入品頂帶

陳瑞龍磐溪人庠生壽八十一與賜肉帛

謝賜履梅岡人好義樂善嘗捐地建宗祠并輸租二十石爲祀典其



他推解之惠猶多雍正丙午邑令李景運高其行獎以齒德紹徽壽八十四授入品頂帶子有德明德監生孫謙庠生

陳有聯桃山人爲人重彝倫尙任恤壽八十四乾隆壬申與賜肉帛子泰階庚午舉人孫鳳翔庠生

倪立德藍田人秉性懇摯少弟家貧卹之使不失所父哲士八十三母陳氏九十一歿時立德年已垂邁哀毀骨立每遇諱辰猶泔泔作孺子啼鄉里聞之皆爲感動同妻林氏俱壽八十子謙受歲貢蔡思仁桃山人少貧苦能以勤儉起其家父沒躬負土成墳母羸弱侍養不離左右壽八十一與賜肉帛孫旅平乾隆辛卯舉人

黃秀文在城人性方嚴而與人謙謹同妻許氏俱壽八十五與賜粟帛

揭陽縣志

卷之六

耆壽

九

楊應箕官溪人庠生性情仁厚遇歲荒常出其所有以周卹饑窮壽八十一

陸正臣桃山人性喜施予雍正丙午丁未歲饑貧鄰無告每人日給米五升同里德之壽八十

袁驤漁湖人監生考授州同壽七十五與賜肉帛

林飛鵬藍田人候選州同值歲饑出米平糶捐銀五十兩助修學宮壽八十一乾隆壬申與賜肉帛

孫峻夫漁湖人壽八十乾隆壬申與賜肉帛

陸元武桃山人性仁厚好與人息訟或解貲爲之和咸稱長者年六十時疽發背大如斗醫皆斂手忽夢神人授以方覺如法治之立愈人謂行善之報壽七十四



卓起元在城人庠生好學能文事繼母撫幼弟均盡其道入無間言  
壽七十

孫家樞漁湖人孝友之性老而彌篤壽九十乾隆壬申與賜肉帛  
倪仕基藍田人貢生候選州同性勤儉家日起遇貧困告貸推解不  
吝尤能以報本返始爲心壽八十四子六人昌平庠生昌吉昌隆  
昌和貢生一堂五代卒時孫二十三人曾孫十七人元孫三人  
孫家樞漁湖人築堤修堰不辭勞瘁壽八十五乾隆壬申與賜肉帛  
陳高經在城人家範嚴整門內雍穆壽八十二授八品頂帶  
何君晉在城人持已端方孳孳爲善壽九十四乾隆辛卯授八品頂  
帶子文燦廩生

陳子良漁湖人壽八十八乾隆壬申授八品頂帶

揭陽縣志

卷之六

耆壽

十

黃和長梅岡人賦性樸誠導和納粹乾隆壬申授八品頂帶壬午與  
賜肉帛壬辰一百一歲給坊價三十兩加賞緞一疋銀十兩建坊  
於榕東渡頭

余昂在城人監生性淳慤重禮讓與弟昱友愛白首無間壽七十九  
邑令劉業勤舉鄉賓

李衍濟在城人性謙和厚重壽八十四邑令劉業勤舉鄉賓

張應韜霖田人監生仁厚傳家講信修睦一堂五代孫曾五十三人  
壽九十七屢與賜肉帛

林世宏藍田人監生嘗捐造潭角石路自潭角渡頭起至陂腹石橋  
止十有餘里又修白石官路與大溝石橋秋江山大陂所費不貲  
夫妻偕老壽九十五一堂五代孫曾二十餘人屢與賜肉帛



陸爾峯桃山人性好學老而彌篤教授生徒多遊庠序壽九十六與賜冠帶孫大輅庠生

黃日攀地美人性孝順父嗜奕客至必強盤餐後父老食多噎輒督妻王氏隔嬰兒乳以飲之喜觀書史雖晚無所遇而士多資之壽九十六與賜冠帶

孫受育漁湖人性好善屢興義舉鄉里重之壽八十六乾隆庚辰與賜肉帛孫夢魁庠生

余開東漁湖人修堤築堰爲一方利賴品望重於鄉閭壽八十四乾隆辛卯與賜肉帛子昌端副貢生

孫文煌漁湖人壽八十三乾隆壬申與賜肉帛

孫正夫漁湖人少能文父國烈憫其不遇援例成均讓於其弟嘗建

揭陽縣志

卷之六

耆壽

十一

文壇築堤堰造躍龍橋修京岡路同妻曾氏俱壽八十二子庭桂庠生

陸亨州桃山人好學工書法壽八十五授頂帶

黃奮飛在城人歲貢生品端學邃善於誘人從其遊者多有成就司訓三水土爭歸之壽八十二

翁文煥在城人喜爲善事生平振貧恤寡掩骼施棺不一而足壽八十

孫璣光漁湖人監生持躬嚴飭爲族正垂二十餘年能和睦鄉里壽八十

袁標青漁湖人少有至性能以義方訓子姪篤嗜學問斷斷吟誦屢空晏如壽七十一



李作梅霖田人少孤貧母陳氏孀居悲悼成癆瘵作梅於憂虞難措之際婉轉承順卒得母氏歡宗族咸稱其孝壽七十一

王次英桃山人壽九十五 陳日炯在城人壽九十二

邱連山官溪人壽八十九 楊萬芝在城人壽八十五

陳兆祥地美人壽八十五 陸元和桃山人壽八十五

侯渭公霖田人壽八十五 陳君度磐溪人壽八十四

林懋典藍田人壽八十四 謝名列桃山人壽八十三

鄭嘉華漁湖人壽八十三 陳宏士桃山人壽八十二

陳士興地美人壽八十二 陳有周桃山人壽八十一

謝名標桃山人壽八十一 袁祥漁湖人壽八十一

孫永瑞漁湖人壽八十一 何士瓊在城人壽八十

揭陽縣志

卷之六

耆壽

十二

已上均賜頂帶

張輝文霖田人壽九十六 林千園霖田人壽九十六

邱和順官溪人壽九十六 柯應諏藍田人壽九十三

謝永錫桃山人壽九十三 林炯山漁湖人壽九十二

陳潤夫在城人壽九十一 柯士樸藍田人壽九十一

黃春明漁湖人壽九十一 陳偉莪地美人壽九十一

李名亨梅岡人壽九十 林載肅在城人壽九十

邱楚璧官溪人壽九十 吳國正梅岡人壽九十

吳偉霖田人壽八十八 黃爾城漁湖人壽八十八

蕭啓章藍田人壽八十六 邱光也官溪人壽八十五

陳允登磐溪人壽八十五 侯明齒霖田人壽八十四



楊慶烈官溪人壽八十四

方應運桃山人壽八十二

楊會杞官溪人壽八十二

邱士髦官溪人壽八十二

盧登榜桃山人壽八十一

林志宏磐溪人壽八十一

洪明棟桃山人壽八十一

林韓客藍田人壽八十一

楊會驥官溪人壽八十一

林善慶磐溪人壽八十

孫如琳在城人壽八十

孫試也官溪人壽八十

孫宣哲在城人壽七十五

陸君勉桃山人壽七十五

吳蔡氏霖田人壽一百歲



列女

閨闈之誼以順爲正飛長比翼鏡不中分女子之願也不幸以節著如衛共姜宋伯姬之屬誰不悲之然或彤管標其嫺坊表耀其閭猶不幸中之幸也若乃窮巷華門饑寒憔悴形單影隻集蓼茹荼而無力上聞草阡淪沒其可悲孰甚也昔人謂臣忠難婦節尤難遇忠臣而弗敬其人必奸覩節婦而弗憐其人必忍中壘傳之蔚宗徑登諸正史良有見哉詎可因其旌揚未及而或遺之志列女

宋

翁道真姑鮑江人年十六喪父弟輿權孤幼族人利其產欲謀害真姑知之携弟避他方撫之成立輿權登紹興壬戌進士爲真陽主簿真姑結菴蓮花地茹淡以終今翁氏子孫歲祭惟用素品云

揭陽縣志

卷之六

列女

明

郭氏名真順龍溪人幼淑慧受書于其父教諭因旁通經史諸家尤精數學能詩文歸潮陽處士周瑤字伯玉值元亂避地居村寨衆推立伯玉真順止之曰矜能輕敵者亡寨中少年方驍桀自用不宜往曰業已許之奈何對曰弟稱疾爲卿謝之寨衆果來真順佯曰諸君不知其驚今欲勉從忽呻吟床褥矣請更立賢者衆然而舍之後果殺其所立爭長大亂寨故多農家子專積粟真順獨勸伯玉散之惟日夜索綯人莫喻其意比賊至盡焚諸積聚伯玉遽引索自繫與妻子俱賊意謂捕虜因得從間道遁去依溪頭寨居焉洪武初命指揮俞良輔南征徇潮州寨人向未內附懼誅真順



時年六十作俞將軍引一篇遮道上之具言寨人無逆狀良輔覽詩大喜遂釋其寨後伯玉卜築縣西後池偕隱居焉子三長碣次礪次礦幼時分受三經至夜誦各與百錢置銅盤紀其數雖精誦必錢盡乃已後三子皆以儒徵碣棲霞令礪增城教諭礦河南參議真順卒年一百二十五子孫遵遺教喪不作佛事祭不用楮帛有梅花百咏行世將軍引詩載藝文碣妻莊氏亦讀書有節概賊至鄉人雜逃避巖穴中氏曰如男女無別何碣曰不避且虜氏曰無禮不如死遂引刀自裁碣誓不復娶

陳貞姑霖田人永樂間適魏謙家三載矣其母弟庠生陳寄早卒遺腹一孤甫週歲而母又卒陳族利孤產謀乳母危之貞姑覺涕泣請辭歸撫孤卽出貲爲謙更娶仍捐陳遺租五十石爲魏舅姑祀

揭陽縣志

卷之六

列女

二

田孤得成立漸大陳宗嘉靖舉人陳學乾卽其後也陳祀姑爲不祧之祖魏家亦感其義歲並祀焉先後縣令兩表其門題其墓曰貞姑

全氏在城人御史全生孫女也年十七歸林廷明克盡婦道天順五年山海寇並起廷明挈家避之行至吉貝湖賊將追及知不免囑夫扶母携幼先逃氏被執欲污之叱曰吾良家婦大義敢辱我卽引刀自刎越四日賊退廷明收屍顏色如生知縣陳爵表其宅曰貞烈

楊氏金惜龍溪人林恭伯妻天順四年海寇魏崇輝爲亂金惜年二十被掠于舟義不受辱乘間投水死兵備毛吉督兵至目擊其事爲立碑于里門



鄭氏在城人庠生林廉潔妻年二十四夫卒無子姑微諭以更節泣曰命也雖愧蘋蘩忍他適乎父母延歸強諭之亦不從內外子姓非吉凶不接見有忌日爲樂者切責之年六十一嗣子請張筵受賀氏曰汝父未安我與若耽樂乎嘉靖元年邑人申督學魏校獎之後巡按涂相按部飭縣製帳爲壽并疏于朝主事陳思謙誌其墓

鄭氏在城人陳一貢妻年十八于歸九閱月而夫故矢志靡他及夫葬扶柩至窆所請築一壙以俟免喪素衣練裙與姑同寢食嘗與母歸同舟日暮猝遇颶風母欲就岸投宿氏曰兒嫠婦可入他人室乎風息卒無恙後邁疾姑欲延醫治之曰婦死無恨但恨事姑不終何醫爲遂卒

揭陽縣志

卷之六

列女

三

陳氏官溪人徐衍繼室也年二十一衍故撫二孤如已出父欲奪志不從自是不復歸寧舅姑亦謂家貧無以爲贍恐不得終汝志曰勿爲慮紡績可供旨蓄督二孤力學長日煥登正德庚午舉人後二子相繼亡氏與日煥婦鄭氏茹苦以歿主簿季本匾其門曰貞節嘉靖四年有司具疏聞於朝

王氏在城人年十八于歸黃翊翊抱哮疾越四載而亡遺孤潭週歲多病煢煢無助姑喪明飲食起居咸藉氏扶持母憐其少微示改適意氏泣曰姑老子幼吾何忍吾無二心孤稍長遣就塾蠶織以資脩脯壽七十五卒姪婦鄭氏年二十五全氏年二十一皆守志主簿季本製匾獎其門

陳氏官溪人性寬裕慈惠識字知書歸鄭宜天家貧甚事翁姑能盡



孝夫故男在襁褓氏典衣具棺殯日紡績啜粥以教其孤鄉族高其節聞於有司主簿季本核實書於勸善錄以獎之年六十終  
曹氏梅岡人吳仲和妻二十四歲而寡無子以姪繼標爲後誓不他適事姑能順承其志教嗣子有方嘗語妯娌曰祖先薄業惟我是屬萬一失墜他日何以見夫地下耶甘齏鹽勤紡績業增於前嗣子亦克肖壽七十終

林氏漁湖人給諫薛宗鎧遷室嘉靖初宗鎧上封事劾權宰汪鉉下獄死妻丁氏哀毀不能起諸孤環泣姑頽然哭子且爲媳哭撫諸孫又哭氏時年十八已絕粒數日旣而曰悞矣吾惡乎死乃起侍湯藥奉姑携幼間關萬里扶櫬南歸抵家而丁氏歿未幾姑繼歿經理三喪以次畢婚嫁井井有條子若女不知爲嫡出也一女十

揭陽縣志

卷之六

列女

四

九孀守一女二十一孀守均能不負姆教氏年五十九卒萬曆甲寅奉詔旌表曰忠門奇節

李氏邑庠生王杓妻杓家貧力學嘗作日錄以省己過氏歸九載而杓亡哀毀不欲生戚屬謂藐孤將何恃乃起執喪兄憐其寡諷以改適厲聲曰從一無二婦之經也寧忍夫爲無伴鬼乎自是埋影毀形燈機月紡鞠子成立子守長廩於庠天啓元年郡守陸典嘉氏節具其事上聞坊其門曰貞節

李氏霖田人庠生謝延訪妻年二十三夫卒抱孤號泣幾致隕絕後矢心堅守日夜辟廬敬養舅姑義方教子曲盡慈愛年逾六十人無間言崇正初巡按梁天奇郡守黃日昌均以節孝表之

蘇氏梅岡人李南軒繼室也先室有子方免懷氏保護不啻己出諸



娣姒皆感嘆後舉二子而南軒卽世氏年甫二十有三也父欲奪其志慟曰婦人從一而終況有三孤在何爲出此言自是深自儉約終身荆釵布裙時時嚴勅兒孫勤習儒業卒年八十二海陽提學林大春銘其墓孫子衍隆慶庚午舉人

劉氏海陽人廣西布政司劉子興女光祿署丞林士登妻也性聰慧通文墨甚得翁姑歡處小星毫無嫌隙所生男女鞠育不啻己出夫歿閨闔肅然善秉家政持籌握算臧獲不敢欺嘗優禮親族咸稱葛藟之芘萬歷間邑令潘應龍製匾嘉獎謂其教本名門德稱女士栢舟之操長貞樛木之慈可咏宜表宅里以正坤儀

黃氏庠生李士豪妻于歸時姑與祖姑俱存寒燠晨昏求說祖姑與姑者無不至士豪故遺二子熒熒在疚未幾二姑繼歿哀毀骨立揭陽縣志

卷之六

列女

五

祭葬盡禮閨門肅清紳士表其事邑令潘應龍以節孝獎之更具文申詳旌表

劉氏霖田人李華宇妻二十失偶矢志偕亡以遺孤呱呱勉撫之成立事翁姑惟謹執喪盡禮年踰八十全節無虧孫二俱遊庠序紳士舉報請旌

林氏漁湖人庠生林瓊賓女梅岡吳懋校妻也歸四載生一女而寡年甫十九晝夜撫棺慟欲偕亡爲救甦者再乃閉門孀守朝夕侍祖姑曾氏側夫弟懋禮天啓間歲貢也止一子欲援俗以長繼長例讓爲繼氏泣辭請以己業百租與族衆祔祀夫於宗祠以祖業所遺附先翁姑爲夫與己墳忌費衆稱善女適庠生鄭卿亦年十九守志時有事祖姑而不異於姑兩世並承孝養身能節而女能



同節二門堪繼流芳之譽申縣旌之

林氏郭應鳳妻年十七歸應鳳二十四而寡遺孤喬春方在乳勉事撫之父母憐其勞獨欲奪志因自誓毀形不施粉素日勤紡績以奉姑課子三十餘年冰霜之操彌勵紳士欽其節孝邑令陳鼎新旌之子喬春員於庠

黃氏漁湖人林德妻庠生林翹楚母也歸七載而德亡雙白在堂一孤三歲家貧甚滄澠師傅之資皆氏十指營辦咸謂孀節中氏爲獨苦請於邑令旌表其門有心矢匪石節已磨錐備極祇事之艱更篤燕詒之業之語壽九十五元孫邦傑

雍正癸卯舉人任蒼梧知縣

袁氏在城人李時習妻庠生袁銳次女年十七歸李三載夫逝哀毀絕粒旬日姑泣諭曰汝矢志從亡如老婦與週歲孩何乃強起執

揭陽縣志

卷之六

列女

六

喪拮据襄事姑病鬻衣珥珥湯藥歿傾囊營葬督孤誦讀霜夜猶紡績於其旁持家儉肅終身粒衣蔬食捧經而已年五十四卒道府屢獎之子可貞庠生

林氏漁湖人儒士邢時輝妻年十六于歸三載生子週歲而時輝卒氏浹旬飯粥不入口姑謂之曰汝若殉藐孤何託吾兒不瞑目矣乃起鞠孤俾得成立氏事翁三載事姑三十載奉養盡歡內外無間邑人敬之上其事請旌子之楫庠生

林氏漁湖人宋博勳妻未笄而父母俱歿家徒壁立親黨無依氏克自成立歸宋遵循婦道年二十八產二子而夫亡哀毀逾節忍死翼諸孤稍長授學于伯叔父時考其成不事姑息後長子爾和廩於庠與從昆弟兆禰大獲兆榕同樹幟文壇氏之力也姑老疾侍



湯藥不懈婦道母儀內外無間邑里咸稱之

吳氏霖田人太僕卿吳裕女孫也歸于莊卞時年十八洎二十六而卞亡教孤以慈事翁姑以孝迨翁姑沒拮据大事咸中禮縣詳請旌有姑病而肝可割塋成而淚已紅閨範允昭婦德無愧之語子士龍庠生

陳氏博羅訓導陳雅道女庠生莊希稷之冢婦也歸未五年卽以未亡人稱獨一女在祿寒影相依茹藜衣敝荆釵布裙姑甚憐之屢不欲以問視煩而氏以紡績得甘旨之供又不在諸妯娒後女旣字氏無病而歿紳士呈其事入邑乘

盧氏霖田人遙授訓導盧應科女也年十七歸林茂德以孝著歷七載產一子甫週歲而夫逝翁姑連歿殮葬盡其誠人以爲不愧孝

揭陽縣志

卷之六

列女

七

子夫弟三人女弟五人氏以嫂道爲母道婚嫁俱如禮族黨義之天啓間年六十邑令馮元颺以彤史良箴匾其閭

林九娘霖田人父時蔓先逝母孀守女年十七未笄崇正三年二月強賊千餘人入鄉肆掠九娘詈之曰賊奴能殺我不能辱我賊艷其姿不忍殺以刃脅之上馬者三罵聲愈厲竟死於賊賊退收屍顏色如生鄉衆葬之共立碑墓側題曰貞女林九娘墓邑令上其事曰烈女林氏貞烈爲性潔白成操遇難而誓死自惜香殘罵賊而撓鋒寧辭玉碎膚當寸磔白日猶昏貌尙如生流丹可碧道府皆旌獎之郭太史之奇弔以詩曰比年賊寇亂村烟贏得偷生問節全里婦驚傳刀下語狂奴許殺未容憐一杯香散陌頭馨三載春風宿草冥貞塚無心催恨色年來空作斷腸青古來烈女死猶



生不愛身前重後名縱使貞魂依雪影豈無彤管樹風聲

鄭氏磐溪人長史鄭天憲孫女孝廉黃日啓妻也崇正元年日啓病篤願以身代曾割臂爲湯日啓絕命幾一日矣湯進而疾少瘥越兩月病復作尋卒氏矢志守節邑令馮元颺聞而弔之後不改其操

國朝

順治三年丙戌九軍賊劉公顯破揭陽婦女以死完節有名可表者黃氏盧正炎妻陳氏諸生梁鴻妻謝氏純玉諸生謝士英女陳氏諸生謝名選妻林氏諸生林扶萬女謝氏林際可妻謝氏諸生楊嘉舉妻鄭氏諸生宋君寵妻謝氏謝凌烟女陳氏謝凌烟妾黃氏陳仙派弟婦曾氏吏員曾玉和女

揭陽縣志

卷之六

列女

八

吳氏梅岡人諸生吳家善次女許字郡庠魏時雨子學銓未幾卒氏年十五聞訃同母奔喪披衰執杖矢志貞守不言笑不修飾坐臥一室人不見其面迨學銓大祥氏染病醫藥弗事向靈慟哭奄然而逝邑令龔元英聞而旌其門

黃氏在城人舉人黃斐姪女東鄉令曾敬妻也質性淳淑舉止端莊仁孝克盡內外稱之及敬解組歸而逝風霜苦節教四子俱遊庠順治三年丙戌九軍賊破縣氏閉戶自經不辱於賊邑人嘉之

曾氏在城人知縣曾敬女中書舍人郭用章妻剛決善治家勤澹澹之供克盡婦職用章早逝貞白自矢教子成立九軍賊劉公顯破縣城掠氏以去厲聲罵賊不屈死

曾氏霖田人處士蔡文華妻順治三年劉公顯作亂避居麥園舉家



爲九軍賊所焚惟氏携週歲子歸寧獲免時年二十二氏含悲忍志拮据撫孤以延夫一綫壽五十三完節終

邢氏漁湖人中書邢鏞曾孫女十六適京岡孫元桂未及一載元桂逝苦節孀守遺腹產一男勤於撫育事翁姑處妯娌和順勤劬俱出人意表鄉鄰欽其懿德多爲感化

吳氏梅岡人謝濟妻上元令吳際盛女進士謝簡捷媳也濟沒時吳年二十有八矢志孀守毀形垢面足不踰閭事姑尤謹越三十餘年僉舉旌表

吳氏霖田人羅文士妻三十而寡以禮自防壽屆百齡有司上其事賜旂帛

潘氏在城人陳俊友妻二十八而寡砥節彌堅賜旂帛卒年七十九

揭陽縣志

卷之六

列女

九

林氏諸生鍾廷選妻年二十四夫亡清勵冰雪孀守四十九年

潘氏廩生鄭崇爵妻孀居時年二十二哭夫喪明閨闈嚴肅妯娌咸敬憚之守節二十六年卒

吳氏陳宏妻守節四十餘年平居以禮自御卒年六十八子士冠庠生孫彝拔貢仕翁源教諭

鄭氏諸生林人望妻年二十一矢志孀守歷二十三年卒

羅氏諸生楊鍾啓妻年二十五守節撫孤後三子俱有成立年五十卒

歐氏掾吏李景雲妻二十七而寡矢志不移守節四十七年卒

陳氏林印客妻孀守四十五年卒年六十九

陳氏漁湖人林昭德妻十七于歸越一載而夫亡遺腹舉一子矢志



撫養康熙十三年寇亂劫其寨氏恐身被污以孤付叔而自投於河賊退族親救之未死皓首全貞年七十四卒子習儒業列成均

蔡氏地美人李榮侯妻年二十五夫亡苦節全貞年七十卒

王氏吳甫妻甫歿時氏年二十四守貞至七十三歲而卒

池氏保昌訓導鄭遜繼室遜歿與側室吳氏誓孀守池年二十八吳年二十三皆以節終嚴課子孫以文學顯於時

江氏廩生鄭麟藩妻年二十餘而夫亡以全節終

謝氏貢生鄭鳴球妻年二十餘而寡從一不易其操以壽終

謝氏梅崗人監生李茂長妻于歸十載而孀居矢志不二垂四十年

江氏黃廷臣妻年未三十而喪偶矢志心栢節歷久彌堅

黃氏諸生謝聯芳妻越十載而寡篝燈紡紉孤幃孀守垂四十年卒

揭陽縣志

卷之六

列女

十

潘氏桃山楊之桂妻年十七于歸甫一載而夫逝靡他矢志節寡居五十六年卒

林氏國學鄭光緒妻年十九而寡獨操井臼茹荼啖苦孀守四十二年

余氏黃試一妻年十九而寡紡績度日孀居七十年

袁氏監生謝元振妻黃氏廩生陳子啓妻孫氏庠生劉廷桂妻皆青年失偶白首全節以終

潘氏舉人陳光朝繼室芳年孀守撫孤德煊娶媳黃氏德煊旋歿黃亦矢志守義垂六十三年卒年九十一姑媳並與賜胙帛

郭氏謝枚妻枚病郭刲股以進翁姑有疾亦如之人稱其苦孝

鄭氏漁湖黃延鍾妻二十八而夫歿守節五十四年卒夫弟黃延進



楊氏年二十孀守年七十三卒

楊氏在城人郭天稠妻詹事之奇四媳也年十四于歸越二載而天稠亡臨歿以老姑爲囑產一女日夜啼號感動鄰里旣而撫嗣子教之成人事姑孝養備至康熙四十四年旌

陳氏在城人郭經妻十八結褵二十而寡矢志孀守勤女工以養姑嫜人稱其孝教三孤成立道銳國學日徽明斌俱庠生康熙四十四年旌

張氏藍田人少失怙恃長適吳朝覲吳歿矢志守節後盧阿滿窺其少艾入室強脅欲污之氏厲聲堅拒不從遂拔刀刺死事聞寘阿滿於法雍正三年建坊旌氏曰千秋勁節

陳氏藍田羅義烈妻十九于歸未三載而寡遺腹產一子矢志不二

揭陽縣志

卷之六

列女

十一

事舅姑克盡其孝子甸雍正癸卯登武科雍正四年旌

林氏磐溪劉可縉妻年十七歸劉越四載而寡孝慈備至卒年四十五雍正五年旌

劉氏國學林其捷妻年十八于歸二十九而寡貞守三十九年奉翁姑能盡婦職訓子孫以義雍正十年旌

謝氏霖田諸生楊長城妻年二十八而寡遺孤四歲翁姑垂白氏矢志孀守甘旨無虧健持門戶三十餘年如一日雍正丙午丁未歲連歉出儉約所積一千餘兩命子貢生有禔設粥廠以賑饑貧一方賴焉雍正十一年旌

黃氏楊鍾利妻海陽人也遭亂喪夫携二孤避地來棉湖教子課女壺範嚴肅能全貞保孤於流離之際雍正十二年旌孫世榜官行



人世達湯陰令曾孫宗燮武進士官浙江瑞安營都司

蔡氏磐溪陳萬穎妻歸陳時年十七未五載而夫逝遺孤奕輝方十日矢志孀守撫孤成立康熙六十年旌

劉氏蔡輝凱妻相夫十載舉二子而夫亡氏侍奉舅姑備極色養未幾長子夭折撫育次子教之成人年逾七十卒

吳氏磐溪林世源妻年十九于歸二十八失偶紡績養親丸熊教子完節以終子士可列成均

黃氏林文喻妻于歸三月而夫亡遺腹得男撫之成立守節四十四年卒

羅氏藍田生員蔡聯芳妻矢志全貞守節三十七年卒

陳氏舉人國璣女經歷羅鶚奮妻也與吳氏許英文妻皆青年失偶

揭陽縣志

卷之六

列女

十二

誓不改適克全婦道者也

余氏貞女淑娘藍田人諸生余朝英女許字儒童黃羸三未成婚羸三年十六抱病危篤余氏時年十五遽歸黃門夫旋亡氏對夫封髮誓死無二孝事翁姑立嗣子其典其偉俱成立青年守志皓首全貞守清節七十四年孫曾繞膝人謂節孝之報

林氏諸生張夔妻年十八于歸二十二而寡矢志冰霜慈孝兼備乾隆元年旌

謝氏林美哲妻于歸四年而夫逝芳齡守節垂老堅貞乾隆二年旌  
史氏諸生李國濬妻歲貢生李鵠舉母也幼慧通文墨年十八于歸九載而寡敬事翁姑勤以課子郡守龍爲霖以陶母風規匾獎之  
乾隆二年旌



陳氏國學會孔溫妻十七于歸三載而寡產一子甫十月敬事舅姑  
義方教子乾隆二年旌

郭氏鄭邦治妻年十七于歸二十三失偶婦職無慚鞠子慈愛鄉評  
推重乾隆二年與賜絹帛

李氏王牧掄妻年十六于歸九載而寡矢志孀守節操堅貞乾隆三  
年旌

林氏諸生鄭貞運妻于歸十載而夫見背矢志柏舟事翁姑克盡孝  
道教子得義方之訓乾隆四年旌

夏氏國學林開運妻二十四失偶孀居清肅婦道無虧乾隆四年旌  
吳氏池可畧妻于歸四載而稱未亡人節守青年貞全白首乾隆七  
年旌

揭陽縣志

卷之六

列女

十三

林氏在城人郭道鱗妻自十九而賦于歸分燈課績未三旬而傷比  
翼代職庭幃教孤子於髫髻之年養髧親于艱難之日乾隆九年  
旌

劉氏鄭淑儀妻年十八于歸越十載失偶貞守至七十六年終乾隆  
十年旌

謝氏郭高澄妻于歸十一載而寡矢志從一事養盡誠乾隆十一年  
旌

王氏在城人儒士孫榮士妻年十八于歸克盡順正未幾失偶之死  
靡他乾隆十六年旌

陳氏官溪人適磐溪林亨遇乾隆己巳九月間鄰人林阿裕出言調  
戲氏羞忿投繯事聞賓阿裕於法乾隆十六年旌



楊氏地美人儒童鄭弼元妻年十九于歸越年夫亡斷髮屏簪持齋茹藥孝於事親而鞠子以義乾隆十七年旌

池氏桃山國學施芝蕃妻年十八于歸三十而寡事姑能孝處妯娌以和居貧習勤守儉敬禮師儒以教二孤王標國學大澤大綸俱邑庠卒年七十八乾隆十八年旌

楊氏在城人邱興寬妻十八于歸二十孀守矢志栢舟克盡婦道乾隆十八年旌

施氏蔡仁者妻年十八于歸二十八而寡謹慎事姑無忝婦道遇歲荒歉尤能出其資以恤貧乏鄉里咸稱之九十六歲卒

何氏黃堯章妻年二十五夫亡斷指自誓守節四十二年乾隆十八年旌

揭陽縣志

卷之六

列女

十四

江氏陳德也妻年二十于歸六載而寡謹於事翁姑尤嚴於教子孀守五十七年卒

黃氏張名園妻年二十四而夫亡家貧甚內外無倚而能懷清履潔歷盡艱辛曾不少悔守節五十餘年

侯氏磐溪人鄭發香妻年十八于歸二十五孀幃孤守一片冰心守節三十七年乾隆十八年旌

陳氏李漢石妻年二十三孀守盡菽水之歡嚴義方之訓歷艱難者四十二年乾隆二十三年旌

陳氏林榮達妻十八爲婦兩載夫亡事親以孝訓孤以慈守節五十餘年

姚氏官溪楊莊敬妻霜守五十餘年子萬根萬機俱列成均



張氏楊東礎妻歸四載而夫歿青年孀守克盡婦道撫育二孤不事姑息人稱其苦節年七十五卒

林氏袁公登妻公登逝遺孤啓亨甫二齡次子尙襁褓氏年二十三父母欲奪其志氏投繯者數以救免乃截髮自誓撫育二子見其成立鄉里欲爲請旌氏曰婦人守節常事耳何敢濫邀褒揚卒止之

劉氏唐德建嫡母年二十七而寡妾王氏生二子長三歲次甫兩月家貧甚氏偕王氏依母家度日子稍長又移家附從弟以居妾王氏先卒氏教養二子三十五年如一日鄉人欽之

陳氏黃士敏妻二十爲婦三載夫亡陳哀慟不欲生繼以姑嫜在堂矢志守節撫育遺腹備嘗艱瘁守節五十九年孫元裳乾隆己卯

揭陽縣志

卷之六

列女

十五

舉人請坊旌表

廖氏漁湖人余君宰妻二十孀居堅心冰守事親鞠子克盡孝慈年七十卒

郭氏劉天寵妻年十八于歸二十三失偶哀毀骨立欲以死殉姑諭以幼子無依乃止貞守四十餘年

許氏諸生鄭錫璽妻年二十一孀居矢志從一事翁姑得其歡心嚴教二子以期成立守節四十餘年

劉氏漁湖人邢大鳳妻年十七于歸兩載卽喪偶誓無二心閨門嚴肅事親教子人無間言守節四十三年

陳氏孫文程妻二十于歸越年卽失所天矢志爲夫延繼後果得立國垣國第其嗣也鄰里嘉之守節四十餘年



周氏生員鄭黃絹妻年二十四夫亡全貞矢志事翁姑克盡婦道守節四十餘年

潘氏陳孟度妻年二十四孀守煢煢孤苦敬事姑嫜全貞白首年七十一卒

侯氏霖田監生陳士璜妻少嫻內則二十六失偶堅心孀守太史韋謙恆錫匾曰熊丸燕翼子二子開保德尉子健國學守節五十一年年七十七卒

陳氏羅裕桐妻于歸三載夫亡堅志柏舟遺腹產一子旋故卜嗣未幾又天族議擇同姓爲繼孫久而後定其處逆境如此矢志靡他守節三十五年

林氏李健園妻年二十于歸二十二失偶奉垂白之姑嫜撫遺腹之

揭陽縣志

卷之六

列女

十六

孤子貞守四十餘年

黃氏磐溪袁貽業妻年十九于歸二十一失偶孝事翁姑喪葬盡禮守節三十年子總武進士孫國樑庠生

許氏陳遜三妻年十七于歸二十夫亡遺腹舉男爲霖孀守三十七年

曹氏李爾飛妻年二十七夫亡立志守節奉兩代髧親俱克盡禮撫孤有教育之方貞守三十二年

江氏羅選育妻年二十五孀守教子以義持家以勤守志三十四年  
劉氏唐基佐妻年二十七失偶家無餘資撫庶子如己出守節三十六年

蔡氏在城人許世夏妻年二十于歸二十二而寡奉翁以孝撫孤以



慈守節五十餘年子之邁國學生

吳氏地美人諸生黃拔選妻年十八于歸二十五而寡貞守七十餘年邑令李景運詳入節孝祠

陳氏在城人謝晉相妻年十八于歸二十五舉一子大璇而寡孝事翁姑白首無懈守節垂五十年

李氏孫恩度妻于歸未幾舉一子必暢遂失所天孝事翁姑教子成立守節五十餘年必暢爲縣吏員

陳氏吏員王仕諤妻年二十八而寡孝事翁姑冰清玉潔懿行無虧守節三十四年子曰端曰中俱國學

陳氏磐溪鄭爾陞妻年二十于歸二十七夫亡以婦道代子職孝養翁姑守節四十餘年

揭陽縣志

卷之六

列女

十七

李氏黃君泰妻年十八于歸二十七孀居乾隆壬申與賜絹帛守節六十餘年

陳氏孫君快妻廩生芳洲母也年十六于歸二十而寡事姑以孝聞貞守六十一年事詳督學惠士奇以琨玉秋霜匾獎之乾隆壬申與賜絹帛年八十一卒孫丹桂亦廩於庠

林氏漁湖人陳日勉妻年二十于歸二十七失偶事親撫子慈孝無虧守節五十八年邑令張甄陶以清標彤管匾獎之

王氏生員陸天毓妻年十八于歸二十四失偶盡婦職於翁姑本義方以訓子守節四十九年子龍御庠生

陳氏楊開夏妻年二十于歸二十六失偶貞節六十餘年與賜絹帛年九十二卒



林氏楊世灼妻國學元傑母也早寡供晨昏盡撫育四代同居公而能忍守節五十六年

潘氏王舉印妻年十七于歸二十二而寡窮無所依撫夫兄子捷步承嗣教之成立守節三十五年

謝氏黃光暹妻于歸六載而寡一慟幾絕以皤皤在堂不忍遽從地下撫遺孤以成立母儀婦職兼而有之

郭氏侯紹祖妻年二十八失偶安分食貧貞守三十餘年

陳氏黃可上妻年十八于歸二十失偶子雲章年二十四復卒與媳王氏共守孤燈課孫誦讀寒暑無間均歷三十餘年

孫氏李陽妻年二十于歸二十一失偶產遺腹子教以成立貞守三十三年

揭陽縣志

卷之六

列女

十八

□□□□妻年十七于歸甫一載失偶產遺腹子娶媳未幾又亡氏與媳同守節五十餘年

黃氏許揆仁妻年十八于歸二十四失偶仰事俯育歷盡辛勤貞守三十五年

胡氏林可戴妻年二十于歸二十三失偶形單影隻誓志柏舟撫夫兄子承嗣待之如己出貞守四十三年

夏氏國學劉瑛妻年十七于歸未幾而寡克勤克儉孝謹以事老翁教子亦克成立

羅氏李佳驛妻年二十于歸二十五而寡事翁姑菽水承歡課孤子有聲庠序貞守三十餘年

林氏陳揚妻年十八于歸二十四失偶時二老在堂雙孤在抱氏承



歡撫育無少懈志

孫氏羅起鑣妻年十七于歸二十二而寡男溶年二十三娶張氏未幾旋亡熒熒兩代同守孤幃俱歷四十餘年

黃氏羅浚明妻年十七于歸未兩載而喪偶敬事翁姑甘旨無缺劬勞教子亦克成人守節三十二年

林氏余世璉妻年十七于歸二十失偶柏舟自矢孤守三十七年

黃氏陳爾登妻年十八于歸二十三失偶產二子在襁褓翁姑均老耄氏左右侍養無違母德亦著貞守三十三年

林氏郭道鎮妻年十七于歸未四載而失偶子高載娶林氏亦早孀婦姑相繼寡居未幾媳復亡熒獨課孫勉之成立守節四十四年

曾氏陳子才妻年十六于歸二十九失偶堂前膝下慈孝交稱貞守

揭陽縣志

卷之六

列女

十九

四十四年

謝氏侯指宏妻年二十一失偶子元德娶婦郭氏二十四亦失偶兩世孀居堅貞共矢謝守節五十年郭守節三十六年

陳氏王瑞榮妻年十八于歸十九失偶撫夫兄子如己出守節三十三年

吳氏 賡文妻年十八于歸卽失偶時遺腹未產矢志靡他後得男勤劬鞠育雍正丙午歲饑氏以女紅供甘旨且周隣里之待舉火

者守節四十餘年

黃氏曾榮玉妻年十七于歸越一載喪偶孝養翁姑貞守四十餘年

林氏楊必達妻于歸九年失偶慟哭不欲生以姑嫜在堂緩須與死勤儉守志撫孤藐以成人守節三十二年



黃氏陳日太妻年二十于歸二十七失偶婦道母儀無慚巾幗貞守六十四年子元標國學孫聖謀廩生

謝氏姚允是妻年二十一失偶青燈獨對皓首無虧守節三十三年黃氏漁湖人陳慶侯妻年十八于歸二十而寡撫孤襁褓祿壺範肅然守節三十五年

蔡氏陳廷輝妻年二十七孀居堅心不易守節三十四年

鄭氏蘇昭煥妻年十八于歸未一載而失偶翁姑復相繼歿以殯以葬歷盡艱辛守節三十四年

黃氏吳力園妻年二十而夫亡奉老撫幼久而不變守節三十七年蘇氏潘□□妻歸五載而失偶敬事翁姑撫育幼子雖饔飧不繼而矢志不移守節五十年

揭陽縣志

卷之六

列女

二十

莊氏胡翰友妻年十七于歸兩載而寡一慟幾絕後奉舅姑能孝守節六十九年

林氏孫君弁妻年二十五孀居奉老撫孤克盡心力守節五十年

邱氏陳茂璣妻年二十六孀居誓志守節三十五年

曾氏池邦禮妻歸未一載遂失所天敬事舅親志不少懈守節三十五年

洪氏霖田人東莞訓導洪之麗女許聘廩生楊聯騰子夫亡守節

姚氏陳明虞妻年十八于歸產兩男逾三歲而失偶艱苦備嘗菽水奉姑終始不懈守節三十一年

王氏桃山人國學謝名顯妻年十八于歸五年喪偶翁老子孤矢志不二以婦代子以母兼師守節三十三年子皇猷列成均



林氏江用之妻年十八于歸二十七失偶垂白無依三孤待哺辛勤紡績以備饗殮守節五十年

徐氏黃繼蕃妻年十六于歸二十二失偶產一子甫週歲卯翼成立家貧寡勤紡績以事翁姑守節三十餘年

林氏李應照妻年二十二失偶矢志從一義方訓子貞守三十二年子欽成庠生

蔡氏方受拱妻年十八于歸二十四失偶翁姑年俱垂邁幼子未離襁褓仰事俯畜終始如一守節四十七年

劉氏王洪茂妻年十八于歸二十二喪偶誓死無二椎髻操作孝事翁姑守節三十三年

蘇氏陳美常妻年十六于歸二十八夫亡室如懸磬克勤克儉啖苦

揭陽縣志

卷之六

列女

二十一

茹酸貞守三十四年

黃氏張名爵妻于歸六年失偶獨持門戶孝養舅姑勤勞訓子守節三十五年

姚氏生員張宏妻年十八于歸而宏抱疾日侍湯藥久無倦容後宏卒矢志自誓守節六十一年

李氏陳崑美妻年二十四夫亡一男骨立氏日夜悲慟翁姑泣勉乃節哀撫孤守節五十年

蔡氏陳漢波妻年二十于歸越六載失偶後翁歿拮据營辦喪葬皆如禮守節四十二年

林氏磐溪人張君福妻年十七失偶舉子華美甘心茹苦矢志靡他守節六十二年



林氏袁公永妻年十七于歸二十二孀守事翁姑以孝撫藐孤以慈  
守節四十二年

郭氏陳宗麟妻年二十二失偶柏操自勵教子義方守節三十八年  
林氏鄭君明妻年十七于歸二十一失偶家徒壁立紡績以育遺孤  
守節四十八年

謝氏漁湖姚聯蜚妻甫于歸而夫歿氏哀毀欲以身殉父母諭以大  
義乃飲泣以事翁姑遺腹舉子肇勳教之成立守節三十八年

陳氏林學君妻年二十八失所天孤燈一室淚眼泫泫未嘗歡笑守  
節四十五年孫子列成均

林氏余球仲妻年二十六而寡善於事翁姑遺腹產一男殷勤鞠育  
備歷艱辛守節三十七年

揭陽縣志

卷之六

列女

二十二

楊氏漁湖人余啓鐫妻年十八于歸二十七喪偶舉二子呱呱待乳  
翁姑皆垂暮能得其歡心守節六十餘年

劉氏孫顯義妻年二十五孀居家無餘貲養翁姑甘旨不缺己惟啖  
苦以教子成人守節四十餘年

曹氏孫振業妻年十七于歸未幾孀居心明從一之義守節四十餘  
年

鄭氏林爾馨妻年二十五失偶冰蘖自矢仰事俯育能兼致之守節  
五十餘年

謝氏吳君慎妻年十七于歸二十孀守遺腹產子艱苦成家守節四  
十七年

蔡氏黃朝恩妻年二十孀居欲以死殉念翁姑垂白無依而止撫孤



子備歷坎坷守節三十七年

陳氏漁湖人林學受妻年二十五失偶劬勞鞠育克盡撫孤之道守節三十餘年

林氏楊聯金妻生員楊載湖母年二十五而失偶奉舅姑撫孤子孝慈無虧守節三十餘年

林氏楊必捷妻年二十八孀居茹荼飲藥不易其操事翁姑以孝聞撫孤子能成立守節四十年子載墉載垣俱列成均

周氏黃次侯妻年二十五夫亡零丁孤苦守志不渝子輝琮列成均守節三十四年

劉氏霖田林東注妻年二十五失偶克勤克儉奉姑嫜撫孤子均盡其道守節五十餘年

揭陽縣志

卷之六

列女

二十三

陳氏霖田林維山妻年二十六寡居事翁姑雖疏食菜羹必鮮潔如所嗜教子耕讀成家守節五十年

楊氏朱型文妻年二十三而寡僅一男在抱矢志撫之事親生事塋祭無違守節三十五年

郭氏陳日宣妻于歸二載而日宣卒氏哀慟欲同死翁姑止之勉以遺腹未育如吾兒一脉何後產男勤劬撫育守節三十年

楊氏陳文會妻年二十而寡敬事翁姑慈撫幼子守節六十餘年鄭氏劉芝光妻年二十而寡守節六十餘年無慚德乾隆壬申與賜

粟帛

袁氏陳士銘妻年十八于歸二十一失偶堂有姑嫜家無儋石事姑盡道教子有成



林氏紀俊萬妻歸四載夫偶遺腹產男一教之成立守節五十二年  
黃氏宋明菴妻年二十孀居事八旬翁姑克盡婦職守節四十九年  
杜氏黃殿魁妻年二十四夫亡孤幃苦志守節四十八年

四十一年

鄒氏曾天衡妻年十七于歸二十一失偶足跡不出閫外事姑訓子  
咸稱巾幗完人守節四十八年

高氏曾允中妻年二十八失偶食貧茹苦儉以持家守節三十七年  
鄭氏諸生楊國棟妻年十六于歸越旬餘而夫卒仆地濱死者數家  
人救甦時加防範乃執婦道以伐子職遺腹藐孤撫之成立守節  
六十七年

揭陽縣志

卷之六

列女

二十四

王氏梅崗國學謝式斐妻年十七于歸越七載而寡家無餘貲奉養  
翁姑甘旨不缺卒年九十有二孫穎口穎和俱明經

李氏楊聯賜妻年二十六孀居仰事俯育俱稱無忝守節四十一年  
羅氏李長郁妻年十七于歸三載夫亡堅心守志守節四十餘年  
李氏王子禮妻年十六于歸二十六失偶冰霜自潔矢志不移撫事  
之禮俱稱無忝守節四十四年

許氏陳起尊妻年二十于歸四載夫亡舉一子萬治操持家政孝養  
舅姑遇歲歉猶能推食及鄰里守節三十餘年

林氏諸生洪奇勳妻年二十于歸越十載而寡奉姑盡孝教三子皆  
成立守節四十三年

薛氏霖田李長敏妻國學崇光母也于歸四載而孀孝奉六旬翁姑



撫孤成立守節四十五年

黃氏林子潛妻年二十二失偶勤於操作教子以義守節三十餘年  
郭氏霖田人陳聰萬妻二十五夫亡婦德著聞守節四十餘年

孫氏林人和妻年十八作孀二十五而寡茹苦益堅守節三十三年  
林氏藍田黃元詔妻守節五十六年壽八十有五

楊氏霖田人監生李啓泰妻年十八于歸二十六夫亡性慈惠撫側  
室子不啻己出守節五十二年子長雄監生

蔡氏周朝任妻守節五十二年子經武邑庠生乾隆四年僉呈督學  
張灝旌之曰松筠比操

林氏在城人薛之琳妻年二十于歸二十四孀守慈孝盡道勤儉成  
家貞心遜志守節四十二年子拔榕國學孫振采庠生

揭陽縣志

卷之六

列女

二十五

湯氏藍田人陳正魁妻庠生在田母笄年寡居孝節之聲聞于郡邑  
守節三十三年

曾氏楊列上妻早寡克盡婦道守節三十六年

蔡氏羅仁瑞妻年二十于歸二十五孀居撫孤成立素衣練裙與姑  
同寢食守節四十年

孫氏吳貴菴妻歸一載而失偶翁姑亦相繼淪喪零丁孤苦育子成  
立守節四十年

陳氏江鳴秀妻年二十七失偶能善事翁姑守節四十七年

陳氏鄭錫元妻年十七于歸二十一失偶孝奉舅姑病則躬侍湯藥  
沒則脫簪營葬守節四十四年

許氏在城人李美臣妻年二十七而寡事高堂撫幼子心力俱瘁守



節三十三年

許氏林集鳳妻于歸未幾卽遽爲嫠一男幼穉鞠育成人後眼見五代孫曾年九十三卒

余氏地美人監生鄭輅妻二十三失偶遺孤又沒撫嗣子鐸音不啻己出守節四十二年鐸音列成均

鄒氏李應彬妻爲婦三年遽失其偶勤樸謹飭閨閭肅然守節三十五年

曹氏孫振業妻年二十七夫亡遺孤在抱撫幼奉髦勤劬備至守節四十一年

鄭氏孫世浩繼室年十七于歸二十七而寡事翁姑先意承志撫元配子如己出守節三十九年

揭陽縣志

卷之六

列女

二十六

陳氏洪旭輝妻年二十九失偶僅遺一男事姑嫜以孝稱守節三十三年

林氏洪允臣妻于歸三載而夫亡一男遺腹生事翁姑克孝守節四十年

楊氏孫世德妻年十八于歸六載失偶奉老撫幼人無間言守節三十四年

郭氏陳炯亭妻年二十九而夫亡撫孤成立守節四十二年

林氏梅岡人陳崇魯妻年十八于歸五月而寡家貧勤織紉以奉翁姑孝敬備至後遺腹生男撫之成立邑紳聞於督學梁山以冰心霜操獎之守節四十八年

孫氏潘心恆妻爲婦三載卽稱未亡人克盡孝道守節四十八年



謝氏國學黃建祖妻諸生宗標母也年二十六孀居奉翁姑撫幼子艱苦備至守節四十七年

許氏鄭程越妻二十一失偶事舅姑情文曲盡撫孤子尤能以義守節六十二年

江氏黃庸敬妻年二十七失偶青年貞志白首彌堅守節五十二年黃氏孫恩容妻年二十而寡奉翁姑以孝撫孤子以慈守節四十六年

劉氏王華玉妻年二十七作未亡人勉持門戶事翁姑能以孝著守節五十八年

劉氏陳名山妻年二十六孀居雙白堂前二孤膝下劉貞志久而不移守節四十八年子時茂庠生

揭陽縣志

卷之六

列女

二十七

湯氏邢喬敬妻年十八于歸二十一而寡翁姑在堂孝敬克勤守節四十五年

黃氏孫顯朝妻年十七于歸二十一孀居遺孤熒熒舅姑垂髦冰心柏節艱苦備嘗守節六十年

劉氏黃學詩妻二十四而寡事姑以孝教子成人守節四十二年

陳氏漁湖人孫顯庸妻年十八于歸產子宗昭越六載而寡敬事翁姑得其歡心姑乳下生毒腫痛不能潰氏數爲親吮膿血盡出乃得無恙性情溫靜善書繡工機績時稱女宗後子孫蕃衍人以爲誠孝之報守節四十八年

黃氏地美人鄭毓泉妻年二十一于歸二十八而寡家門冷淡氏勤事女紅下育遺孤明哲明睿上奉髦姑林氏備極艱難守節四十



七年

蘇氏海陽鳳隴人適桃山監生謝喜成年二十于歸產子文從越三載而寡性孝摯遇翁姑病小心調侍湯藥久而不懈聞者咸稱其誠孝守節五十七年

黃氏漁湖人孫顯我妻年二十于歸產子榮儀二十二而寡守節四十八年

盧氏在城人許德臣妻年十八于歸舉子捷豐二十七而寡孝事翁姑教子成立雍正丙午丁未連歲饑饉能出其所有分濟里鄰賴其惠者甚衆乾隆八年諸生僉呈督學梁公文山錫以柏節松齡匾額守節五十七年

鄭氏在城人洪乃實妻年十六歲于歸二十五而寡遺腹產子振光

揭陽縣志

卷之六

列女

二十八

守節三十二年

李氏在城人許彤可妻年十八于歸二十六而寡產子茂發甫兩月矢志奉養老姑鄭氏撫育嬰兒克有成立守節五十四年

黃氏漁湖人魏伯慶妻年十八于歸產子謙端越八載而寡守節四十七年

黃氏桃山人謝梓貴妻年十八于歸產子禮甫週歲越六載而寡時翁姑已逝遺祖姑在堂氏色養備至守節二十七年

吳氏在城人黃大炎妻年二十于歸產子宗玉越兩載而寡守節三十四年

鄭氏桃山人周肅容妻年二十于歸產子良甫三歲越五載而寡閨範嚴謹孝養翁姑見五代孫曾守節五十五年



李氏在城人潘奇亮妻年十八于歸二十二而寡產子肇璞僅六月  
上有髦姑產薄幾不克自存拮据茹藥孝慈兼至鄰里敬之守節  
五十八年

潘氏地美人翁殷臣妻年十八于歸產三子七載而寡家計貧寒三  
代形單影隻無期功強近之親忍饑餒以事姑勤紡紝以鞠子鄰  
里莫不憐而敬之守節三十八年

楊氏在城人許世忠妻產一子甫四月年二十而寡家貧苦能盡孝  
慈守節二十五年

林氏在城人陳洛繇妻年十八于歸產二子越七載而寡事髦姑撫  
幼子人稱孝慈守節三十年

王氏桃山人謝復薦妻年十八于歸子恆錦越七載而寡事姑訓子

揭陽縣志

卷之六

列女

二十九

鄰里稱之守節五十二年

吳氏梅岡人池治常妻年二十于歸產子邦奇邦才二十九而寡守  
節四十二年

林氏在城人李元晞妻年十八于歸產子佳炎十九而寡守節五十  
三年

郭氏桃山人適漁湖陳元真年二十于歸未及一月而元真故氏慟  
哭不已隨自經以從夫地下鄰里咸哀之

李氏霖田人職監陳子俊妻年十八于歸產子名隆越十載而寡妾  
王氏產子名陞同心孀守事翁姑以孝撫孤幼以義守節四十年

乾隆三十七年旌

黃氏潮陽洋尾人適官溪鄭其偉年二十于歸產子家明越三載而



寡家資淡薄饘粥恆艱上有翁姑外有父母均需奉養氏貞靜勤儉機燈紡月無間寒暑鄰戚咸稱之現年八十六守節六十三年  
蔡氏在城人許孟爵妻年十八于歸產三子二十九而寡現年八十六守節五十八年

李氏磐溪人廩生陳王興妻年十八于歸舉兩子越二載而寡現年八十五守節六十四年

謝氏梅岡人舉人謝嘉賓孫女年十七歸江鳴光產二子鍾顯鍾德年二十而寡現年八十一守節六十一年

周氏霖田人郭廷楚妻年十七于歸十八而寡遺腹產子允哲家貧矢志柏舟現年七十九守節六十一年

謝氏海陽賈里人適桃山都監生陳元貴年十八于歸產二子登臨

揭陽縣志

卷之六

列女

三十

登秀越五載而寡敬老姑鞠幼子督孫尙德誦讀致遊泮水以孝慈聞現年七十八守節五十五年媳謝氏登臨妻年十九于歸二十產子淑耀甫彌月而寡事姑甚謹得其歡心現年五十九守節三十九年

方氏霖田人陳乃聞妻年十七于歸二十八而寡家貧甚饔飧常不給氏矢志養姑鞠遺腹子以至成立現年七十四守節四十六年  
李氏在城人許穎深妻年二十二而寡現年七十九守節五十九年  
媳鄭氏子忠妻年二十一產子在慶而寡現年五十四守節三十一年

何氏藍田人張中柱妻年二十五于歸產一子越三載而寡現年七十六守節四十八年



邱氏地美人黃桐佑妻年十八于歸育一子一女越五載而寡孝於翁姑生事葬祭盡禮現年七十二守節四十九年

黃氏漁湖人孫恩傳妻年十八于歸產二子顯益顯緘越五載而寡孝慈并至現年六十九守節四十七年

吳氏藍田人通判吳崇駿女年二十適貢生陳廷泰產子元聲二十七而寡現年六十八守節四十一年

陳氏霖田人蔡日炎妻年十八于歸產子起舞越兩載而寡饗殮不給矢志彌堅現年七十守節五十年

陳氏在城人庠生黃峻峯妻舉一子年二十三而寡事親鞠子艱苦備嘗現年六十六守節四十三年

李氏霖田人陳以顯妻年十七于歸越八載而寡事翁姑育孤幼均盡其道現年六十三守節三十八年

陳氏漁湖人林恪軒妻年十八于歸越五載而寡現年六十四守節四十一年

林氏磐溪人陳慰其妻年十八于歸二十七而寡產一子甫三歲氏知書識義事姑克盡婦道現年六十四守節三十七年

林氏普寧人適在城監生陳元標年十七于歸二十八而寡事翁姑鞠幼稚以孝慈聞現年六十三守節三十五年

邱氏梅岡人楊元之妻年十八于歸越年產子其璇甫一月而寡矢志柏舟節孝克著現年六十四守節四十六年

鄭氏桃山人謝泰憲妻年二十于歸產三子越七載而寡現年六十二守節三十六年



李氏霖田人楊士達妻年十八于歸產子文繼越兩載而寡敬事翁姑得其歡心撫守孤嬰教之成立現年七十一守節五十三年

黃氏霖田人翰翼妻年十七于歸越年產子方一月而寡現年六十二守節四十四年

孫氏地美人監生鄭煥彩妻年二十于歸產二子承家克家越四載而寡現年六十二守節三十八年

蔡氏桃山人監生洪恩榜妻年二十于歸越三載而寡遺腹產一子日昇敬事翁姑克盡孝道足不窺戶鞠子成立現年六十一守節三十八年

楊氏在城人監生黃繼莪妻年十八于歸產子光健二十五而寡現年六十守節三十五年

揭陽縣志

卷之六

列女

三十二

黃氏桃山人監生劉光國妻年十七于歸產子成器甫週歲二十五而寡敬事翁姑後姑老多病轉仄需人氏晨夕侍側衾衽湯藥調護維謹持家勤整人無間言現年五十七守節三十二年

鄭氏桃山人陸亨司妻年十八于歸越年產子甫四月而寡現年五十九歲守節四十年

王氏霖田人貢生陳子元妻年十八于歸產子名登越七載而寡敬以事姑正以訓子現年七十一守節四十六年

蔡氏藍田人庠生江鴻妻年十八于歸產子學海盛遠二十八而寡自矢柏舟足不踰閭閻事翁姑以孝課二子以書現年五十八守節三十年

許氏磐溪人陳德蔚妻年十八于歸二十二而寡遺腹產子鶴元孝



敬翁姑克勤婦職現年五十六守節三十四年

黃氏磐溪人陳振先妻年十九于歸產子宇貴三載而寡奉親訓子克盡其道現年五十五守節三十三年

邱氏梅岡人李時聘妻年十八于歸產一子越七載而寡現年五十五守節三十年

陳氏在城人蕭步蟾妻年十八于歸產子子龍二十四而寡事姑克孝訓兒有方現年五十五守節三十一年

鄭氏地美人李國柱妻年十六于歸產子起敏越四載而寡事親育幼人無間言現年六十一守節四十一年

曾氏官溪人吳遠輝妻年十九于歸產一子越兩載而寡現年五十四守節三十三年

揭陽縣志

卷之六

列女

三十三

陳氏官溪人年十七歸鄭啓鵬越年產子和麟而寡矢志靡他能盡慈孝現年五十一守節三十三年

黃氏漁湖人孫顯雅妻年十七于歸產子榮勵二十而寡現年五十一守節三十一年

鄭氏梅岡人直督大進妹也年十九適江鍾岱越四載而夫亡性端淑嫻內則克盡婦道鄰里稱之現年六十七守節四十四年子家纘監生

黃氏霖田人舉人陳文峯妻年十八于歸產子潤英二十九而寡敬事翁姑克盡婦道現年六十二守節三十三年

林氏許樹國妻于歸入載而夫喪矢志靡他女紅自給歷久不衰守節三十年



楊氏桃山人王洪睿妻年十七于歸甫六月而寡矢志不二孝侍翁姑撫子基璧以承夫嗣現年五十守節三十二年

李氏梅岡人江鳴恬妻年二十一于歸性情溫靜執婦道甚恭甫九逾月而夫染疴忽逝時氏歸寧聞訃鬚髻奔回治喪越七日送夫窆窆是夜卽以死殉邑令劉業勤錫以義烈秋霜匾褒之



坊表

攀桂坊爲永樂乙酉人楊順立

凌霄坊爲永樂戊子舉人洪添立

登雲坊爲永樂戊子舉人鄭志謹立

五桂坊爲永樂甲午舉人許訓黃源祿謝仕黃源壽鄭敏立

進士坊爲永樂戊戌進士洪廉立

進士坊爲天順丁丑進士徐虔立

進士坊爲天順癸未進士陳仕寶立

登瀛五馬坊在漁湖都爲舉人教諭孫齊歲貢生澧州同知孫瑀立

穿楊坊爲正統辛酉舉人葉進立

冲霄坊爲正統辛酉舉人吳胄立

揭陽縣志

卷之六

坊表

觀光坊爲貢生仕番禺縣知縣林睿立

文光坊爲景泰癸酉舉人蔡顥謝雍立

文衡坊爲太僕寺少卿吳裕立

解元坊爲成化庚子解元林昕立

進士坊爲成化甲戌進士王昂立

步雲衢坊爲成化庚子舉人陳璋立

冠英坊爲成化丙午舉人蘇瑀立

進士坊爲宏治庚戌進士林善立

世桂坊爲正統辛酉舉人吳胄宏治壬子舉人吳笏成化壬辰進士

吳裕父子立

父子鄉賢坊在宣化街爲國子博士薛俊光祿寺少卿薛宗鎧父子



立

奕世青雲坊在宣化街爲慶遠府教授黃勳興化府知府黃一道父子立

司徒正郎坊在宣化街爲都勻府知府林鳴鸞立

平交偉績坊在宣化街爲兵部尙書翁萬達立

萬里長城坊在宣化街爲兵部尙書翁萬達立

進士坊在宣化街爲廣西僉事林松立

聚奎坊在縣前爲歷科題名立

龍飛首盛坊在太平橋爲戊辰四進士郭之奇黃奇遇宋兆禴辜朝

薦立

昇平人瑞坊在桃山都爲百歲謝天官立

揭陽縣志

卷之六

坊表

二

狀元坊在宣化街爲辛丑狀元林德鏞立

重宴鹿鳴坊在宣化街爲己卯舉人乙未進士許登庸立

藥榜重逢坊在宣化街爲康熙甲午科舉人陳元才立

忠義臣隣坊在東關外爲光祿署正邢瑞捐助邊餉立

孝子坊在達道坊馬山窖邊爲黃顯生立

貞列坊在磐溪都爲林亨遇妻陳氏立

節孝坊在官溪都爲黃堯章妻何氏立

節孝坊在馬山橋爲郭高澄妻謝氏立

節孝坊在漁湖都爲鄭淑儀妻劉氏立

節孝坊在東門街爲郭道鱗妻林氏立

節孝坊在梅岡都爲池畧可妻吳氏立



節孝坊在磐溪都爲監生林開運妻夏氏立  
節孝坊在漁湖都爲生員鄭貞運妻林氏立  
節孝坊在霖田都爲王牧掄妻李氏立

節孝坊在攀龍坊爲監生曾孔溫妻陳氏立

節孝坊在解元坊爲生員李國濬妻史氏立

坤貞寵錫坊在藍田都爲林美哲妻謝氏立

節孝坊在磐溪都爲生員張夔妻林氏立

節孝坊在朝天坊爲監生孫天角妻余氏立

節孝坊在霖田都爲楊鍾利妻黃氏立

節孝坊在霖田都爲生員楊長城妻謝氏立

節孝嗣徽坊在官溪都爲鄭二其妻黃氏立

揭陽縣志

卷之六

坊表

三

節孝坊在磐溪都爲監生林其捷妻劉氏立

貞壽之門坊在漁湖都爲廩生黃大賓妻張氏百歲立

節孝坊在魁元坊爲黃仕敏妻陳氏立

萱萼凌霜坊在攀龍坊爲庠生李衍淳妻氏林立

貞節坊在進賢門外爲庠生王杓妻李氏立

比翼朝天坊在官溪都爲楊起周妻洪氏立

昇平人瑞坊在榕東渡頭爲百歲黃和長立

節孝坊在霖田都爲職監陳子俊妻李氏立



塋墓

宋

知潮州軍事彭延年墓在官溪都浮邱山廬陵人官至大理寺正卿

處士鄉賢郭叔雲墓在漁湖都塘口村正德間知縣陶楨為文至墓展祭

知梅州軍事陳希伋墓在藍田都上陽村其祖墓在黃岐山走馬龍

知揭陽事孫乙墓在磐溪都雙山寺側

元

翰林侍講學士楊宗瑞墓在官溪都錢岡山布政參議裔孫楊鍾岳撰墓碑

明

太僕寺丞王昂墓在李杭山編修蘇葵撰銘後以地不吉權厝於所居之後山中

長史贈少卿莊典墓在韓山東白瓷窰山賜諭祭

揭陽縣志 卷之六 塋墓 四

太僕寺少卿吳裕墓在黃岐山賜祭葬學士吳寬撰神道碑

御史鄭一初墓在仙橋山新建伯王守仁有文祭之嘉靖丙戌御史謫簿季本題曰名賢之墓

兵部尚書翁萬達墓在三河賜祭葬

江華知縣吳繼喬墓在梅岡都天啓六年知縣馮元鳳撰墓碑

監正贈給事薛俊墓在東廂九郎山

司正贈御史薛侃墓在地美都鳳鳴山

給事贈寺卿薛宗鎧墓在楓洋賜諭祭

翰林編修鄭一統墓在官溪都紫陌山

廣西按察司僉事林松墓在梅岡都古者山大理卿周光鎬撰銘

翰林詹事郭之奇墓在藍田都石礪坑

翰林詹事黃奇遇墓在鯉魚溝山雞心嶺



吏部員外郎羅萬傑墓在藍田都龍湫潭

天津道參議王宗昌撰銘

貞女林氏九娘墓在霖田都洋下村

月容黃氏墓在黃岐山竺岡巖右

黃氏楊州人知縣馮元廳侍妾

國朝

封內閣中書謝紹舉墓在梅岡都謝杭山

進士中書謝簡捷墓在梅岡都玉窖渡

贈中書鄭科偉墓在地美都南隴後東山

行人楊世榜墓在湖尾鄉

陝西按察使大埔楊繼緒撰墓碑

贈通奉大夫鄭連城墓在梅岡趙厝浦後山

贈通奉大夫鄭養性墓在梅岡漁翁洞山

刑部尙書素憲田撰墓碑

贈昭勇將軍舉人羅鎮瑞墓在梅岡都嶠石嶺下官山

揭陽縣志

卷之六

墓

五

福建銅山營叅將羅廷柱墓在藍田都羅厝山

贈儒林郎候選州同陳廷耀墓在霖田都厚田山

封文林郎舉人陳元才墓在霖田都大公山

進士番禺凌魚撰銘



雜記

唐

桃山都白石山出白象自行抵州渡濠從西門入今郡西湖一名象湖以此刺史表聞於朝詔取至京其象奴卽白石鄉人能降服之

宋

張法星霖田人巫師也有道術爲人祈禳人酬以米粟恆拾葦蓆作舟載歸一日過三山被三山國王神遣風覆之法星怒歸語其妻曰吾當力與國王鬪汝勿舉哀吾七日後復歸也言訖而逝數日後忽見一女子以米數粒置法星口中化爲虫妻見之大哭空中聞法星謂之曰吾今不復還矣當以鐵嵌棺首置於國王廟前之潭也妻從之水暴漲棺浮而擊崩其墻三山神乃讓居座左鄉人揭陽縣志

卷之六

雜記

肖像合祀之

孫道者桃山都人宋乾道九年生父名乙早喪鞠於兄九歲時嫂晒穀命護雞謂嫂曰雨且至嫂詈曰青天白日曷有雨道者以竿揚之雨大至漂穀嫂嘗漬米將炊命採薪道者曰我已有供火者夜以脚代薪炊遂熟翌早鄰人棹脚盡折嘗牧牛以竹枝圍插牛不敢踰年十二同兄入郡見官禱雨弗應乃曰此易事若以我禱卽應否願自焚人告府主命之禱卽刻雨降城中水深三尺淳熙十三年牧牛寶峯山巔忽不見後奉文勅封靈感風雨聖者八字揭於廟中今鄉人遇旱則詣寶峯山上焚香致祝雨輒應焉

明

漁湖都塘口村有人擇地葬孕婦者於墓中生子後出現常抱子往



市鬻物及去則錢財皆爲紙灰衆告官令啓之其子尙活今漁湖都畱中所謂娘子墳者是也此與澄海黃鬼子事正相類

昭靈廟原屬民鄭義戶地嘉靖元年奉文毀淫祠有坊民曾姓謀買之鄭義訴於官曾詭呈上司批府行勘有畝麥在鄭冊曾又逆理強辯官使二人同誓於城隍神曾誓畢旋吐血死有黨曾者曰彼家人曾死於吐血此偶然耳黨者亦旋死罔誓固爲神所譴也今畝麥尙在鄭義戶中

嘉靖末山寇蘇劉等嘯聚藍田山谷中勢甚猖獗總兵郭成督師征之至小灘見七婦人渡水語以賊窠所在并授進勦日期後賊平果如其言因立廟於灘上以祀之

國朝

揭陽縣志

卷之六

雜記

二

康熙十三年甲寅三月間梅岡都龍砂寨人江孚萬子友建晌午在田芸苗驀來一兵手執旗竿旗內大書一倫字勒其持往深坑及至深坑旗與兵皆不見越四月二十一日潮鎮劉進忠叛次年五月廿一日大師進勦失利於此地殺傷殆將萬人始悟旗兵之兆然卒不解倫字之爲何義也

僧海德俗姓蕭饒平人幼薙髮出家於揭陽觀音堂修梵行後分創於福善菴順治三年丙戌揭邑陷於賊積屍數萬收而瘞之作同歸塚於舊教場十年癸巳郡城破橫骸遍野又與義士鍾萬成收遺屍十餘萬作普同塔於葫蘆山十四年丁酉奉文旌獎好義鍾萬成在城人行止端重好善持齋當事縉紳悉加禮敬精岐黃術貧不能具藥價者施之道路有難行者常爲修砌嘗有盜入其家



欲行竊萬成覺之盜怖甚溫言慰留且爲具酒食且以白鏹遺之盜由是感激改行順治癸巳郡城陷與僧海德收骸葬之又收枯骨瘞於大泉石馬紫服諸山共入塚順治丁酉奉文旌表其門曰壺中恩溥並以冠帶榮之

楊廷燦號翠峯在城人性慧習醫自素問難經以及歷代方書皆能上口背誦切脈洞見癥結前後全活數千人間施藥餌不受值遇歲歉常出其所得設粥以助賑饑有司屢旌獎之

林綠園磐溪都喬林人性和平溫慤居恆以樂善好施爲事庭內雍然皆臻壽考己年八十妻潘氏八十有一舉四子長志上貢生八十有六次秀芝監生八十有四次秀華監生八十有一次秀麗監生八十有四見者謂香山九老睢陽五老者英十三老古今以爲

美談然皆異姓相聯初非一家之親也今父母兄弟悉至八旬此固由其仁厚之德所致實 國家重熙累洽久道化成之休徵也